

明刊



本紀卷第四

元史四

翰林學士亞中大夫知

制誥兼修國史臣宋濂翰林待制承直郎兼國史院編修官

勅修

世祖一

世祖聖德神功文武皇帝諱忽必烈睿宗皇帝第四子母莊聖太后怯烈氏以乙亥歲八月乙卯生及長仁明英睿事太后至孝尤善撫下納弘吉刺氏為妃歲甲辰帝在潛邸思大有為於天下延藩府舊臣及四方文學之士問以治道歲辛亥六月憲宗即位同母弟惟帝最長且賢故憲宗盡屬以漠南漢地軍國



庶事遂南駐瓜忽都之地邢州有兩谷刺罕言於帝曰邢吾分地也受封之初民萬餘戶今日減月削纔五七百戶耳宜選良吏撫循之帝從其言承制以脫兀脫及張耕爲邢州安撫使劉肅爲商榷使邢乃大治歲壬子帝駐桓撫間憲宗令斷事官牙魯瓦赤與不只兒等總天下財賦于燕視事一日殺二十八人其一人盜馬者杖而釋之矣偶有獻環刀者遂追還所杖者手試刀斬之帝責之曰凡死罪必詳讞而後行刑今日殺二十八人必多非辜旣杖復斬此何刑也不只兒錯愕不能對太宗朝立軍儲所于新衛

以收山東河北丁糧後惟計土且取銀帛軍行則以資之帝請于憲宗設官筑五倉于河上始令民入粟宋遣兵攻虢之盧氏河南之永寧平衛之八柳渡帝言之憲宗立經畧司於汴以忙哥史天澤楊惟中趙壁爲使陳紀楊果爲參議但屯田唐鄧等州授之兵牛敵至則禦敵去則耕仍置屯田萬戶於鄧完城以備之夏六月入覲憲宗於曲先惱兒之地奉命帥師征雲南秋七月丙午禡牙西行歲癸丑受京兆分地諸將皆築第京兆豪侈相尚帝即分遣使戍興元諸州又奏割河東解州鹽池以供軍食立從宜府于京兆屯

田鳳翔募民受鹽入粟轉漕嘉陵夏遣王府尚書姚
樞立京兆宣撫司以李蘭及楊惟中爲使關隴大治
又立交鈔提舉司印鈔以佐經費秋八月師次臨洮
遣王律木王君候王鑑諭大理不果行九月壬寅師
次忒刺分三道以進大將兀良合帶率西道兵由晏
當路諸王抄合也只烈帥東道兵由白蠻帝由中道
乙巳至滿陀城留輜重冬十月丙午過大渡河又經
行山谷二千餘里至金沙江乘革囊及楫以渡摩娑
蠻主迎降其地在大理北四百餘里十一月辛卯復
遣王律木等使大理丁酉師至白蠻打郭寨其王將

出降其姪堅壁拒守攻拔殺之不及其民庚子次三
甸辛丑白蠻送款十二月丙辰軍薄大理城初大理
主段氏微弱國事皆決於高祥高和兄弟是夜祥率
衆遁去命大將也古及拔突兒追之帝既入大理曰
城破而我使不出計必死矣己未西道兵亦至命姚
樞等搜訪圖籍乃得三使尸既瘞命樞爲文祭之辛
酉南出龍首城次趙瞻癸亥獲高祥斬于姚州留大
將兀良合帶戍守以劉時中爲宣撫使與段氏同安
輯大理遂班師歲甲寅夏五月庚子駐六盤山六月
以廉希憲爲關西道宣撫使姚樞爲勸農使秋八月

至自大理駐桓撫間復立撫州冬駐瓜忽都之地歲
乙卯春復駐桓撫間冬駐奉聖州北歲丙辰春三月
命僧子聰卜地于桓州東灤水北城開平府經營宮
室冬駐于合刺八刺合孫之地憲宗命益懷州為分
地歲丁巳春憲宗命阿藍荅兒劉太平會計京北河
南財賦大加鉤考其貧不能輸者帝為代償之冬十
二月入覲于也可迭烈孫之地議分道攻宋以明年
為期歲戊午冬十一月戊申禡牙于開平東北是日
啓行歲己未春二月會諸王于邢州夏五月駐小濮
東平宋子貞李昶訪問得失秋七月甲寅次汝

南命大將拔都兒等前行備糧漢上戒諸將毋妄殺
命楊惟中郝經宣撫江淮必闔赤孫貞督軍須蔡州
有軍士犯法者貞縛致有司白于帝命戮以徇諸軍
凜然無敢犯令者八月丙戌渡淮辛卯入大勝關宋
戍兵皆遁壬辰次黃陂甲午遣廉希憲招臺山寨比
至千戶董文炳等已破之時淮民被俘者衆悉縱之
庚子先鋒茶忽得宋沿江制置司榜來上有云今夏
謀者聞北兵會議取黃陂民船繫棧由陽邏堡以渡
會于鄂州帝曰此事前所未有願如其言辛丑師次
江北九月壬寅朔親王穆哥自合州釣魚山遣使以

元史本紀卷四
四
憲宗凶問來告且請北歸以繫天下之望帝曰吾奉命南來豈可無功遽還甲辰登香鑪山俯瞰大江江北曰武湖湖之東曰陽邏堡其南岸即滸黃洲宋以大舟扼江渡帝遣兵奪二大舟是夜遣木魯花赤張文謙等具舟楫乙巳遲明至江岸風雨晦冥諸將皆以爲未可渡帝不從遂申敕將帥揚旗伐鼓三道並進天爲開霽與宋師接戰者三殺獲甚衆逕達南岸軍士有擅入民家者以軍法從事凡所俘獲悉縱之丁未遣王冲道李宗傑訾郊招諭鄂城比至東門矢下如雨冲道墜馬爲敵所獲宗傑郊奔還帝駐滸黃

洲已酉抵鄂屯兵教塲庚戌圍鄂壬子登城東北壓雲亭立望樓高可五丈望見城中出兵趨兵迎擊生擒二人云賈似道率兵救鄂事起倉卒皆非精銳遂命官取逃民棄糧聚之軍中爲攻取計戊午順天萬戶張柔兵至大將拔突兒等以舟師趨岳州遇宋將呂文德自重慶來援都兒等迎戰文德乘夜入鄂城守愈堅冬十月辛未朔移駐烏龜山甲戌拔突兒還自岳十一月丙辰移駐牛頭山兀良合帶畧地諸蠻由交趾歷邕桂抵潭州聞帝在鄂遣使來告時先朝諸臣阿藍荅兒潭都海脫火思脫里赤等謀立阿里

不哥阿里不哥者睿宗第七子帝之弟也於是阿藍
荅兒發兵於漠北諸部脫里赤括兵於漠南諸州而
阿藍荅兒乘傳調兵去開平僅百餘里皇后聞之使
人謂之曰發兵大事太祖皇帝曾孫真金在此何故
不令知之阿藍荅兒不能荅繼又聞脫里赤亦至燕
后即遣脫歡愛莫干馳至軍前密報請速還丁卯發
牛頭山聲言趨臨安留大將拔突兒等帥諸軍圍鄂
閏月庚午朔還駐青山磯辛未臨江岸遣張文謙還
諭諸將曰遲六日當去鄂退保潞黃洲命文謙發降
民二萬北歸宋賈似道遣宋京請和命趙璧等語之
曰汝以生靈之故來請和好其意甚善然我奉命南
征豈能中止果有事大之心當請於朝是日大軍北
還己丑至燕脫里赤方括民兵民甚苦之帝詰其由
托以憲宗臨終之命帝察其包藏禍心所集兵皆縱
之人心大悅是冬駐燕京近郊

中統元年春三月戊辰朔車駕至開平親王合丹
只吉率西道諸王塔察兒也先哥忽剌忽兒亦都察
東道諸王皆來會與諸大臣勸進帝三讓諸王大臣
固請辛卯帝即皇帝位以禡禡趙璧董文炳爲燕京
路宣慰使陝西宣撫使廉希憲言高麗國王嘗遣其

世子僖入覲會憲宗將兵攻宋僖留三年不遣今聞其父已死若立僖遣歸國彼必懷德於我是不煩兵而得一國也帝是其言改館僖以兵衛送之仍赦其境內夏四月戊戌朔立中書省以王文統爲平章政事張文謙爲左丞以八春廉希憲商挺爲陝西四川等路宣撫使趙良弼參議司事粘合南合張啓元爲西京等處宣撫使己亥詔諭高麗國王王僖仍歸所俘民及其逃戶禁邊將勿擅掠辛丑以即位詔天下詔曰朕惟祖宗肇造區宇奄有四方武功迭興文治多缺五十餘年於此矣蓋時有先後事有緩急天下

大業非一聖一朝所能兼備也先皇帝即位之初風飛雷厲將大有爲憂國愛民之心雖切於己尊賢使能之道未得其人方董夔門之師遽遺鼎湖之泣豈期遺恨竟勿克終肆予冲人渡江之後蓋將深入焉乃聞國中重以僉軍之擾黎民驚駭若不能一朝居者予爲此懼駟騎馳歸目前之急雖紓境外之兵未戢乃會群議以集良規不意宗盟輒先推戴左右萬里名王巨臣不召而來者有之不謀而同者皆是咸謂國家之大統不可久曠神人之重寄不可暫虛求之今日太祖嫡孫之中先皇母弟之列以賢以長止

予一人雖在征伐之間每存仁愛之念博施濟衆實可爲天下主天道助順人謨與能祖訓傳國大典於是乎在孰敢不從朕峻辭固讓至於再三祈懇益堅誓以死請於是俯徇輿情勉登大寶自惟寡昧屬時多艱若涉淵水罔知依濟爰當臨御之始宜新弘遠之規祖述變通正在今日務施實德不尚虛文雖承平未易遽臻而飢渴所當先務嗚呼曆數攸歸欽應上天之命勲親斯託敢忘烈祖之規體極逮元與民更始朕所不逮更賴我遠近宗族中外文武同心協力獻可替否之助也誕告多方體予至意丁未以翰

林侍讀學士郝經爲國信使翰林待制何源禮部郎中劉人傑副之使于宋丙辰叔輯中外官吏宣劄牌面遣帖木兒李舜欽等行部考課各路諸色工匠置急遞鋪乙丑徵諸道兵六千五百人赴京師宿衛置互市于漣水軍禁私商不得越境犯者死是月阿里不哥僭號于和林城西按坦河召賈居貞張徹王煥完顏愈乘傳赴闕五月戊辰朔詔燕帖木兒忙古帶節度黃河以西諸軍丙戌建元中統詔曰祖宗以神武定四方淳德御群下朝廷草創未遑潤色之文政事變通漸有綱維之目朕獲纘舊服載擴丕圖稽列

聖之洪規講前代之定制建元表歲示人君萬世之傳紀時書王見天下一家之義法春秋之正始體大易之乾元炳煥皇猷權輿治道可自庚申年五月十九日建元為中統元年惟即位體元之始必立經陳紀為先故內立都省以總宏綱外設總司以平庶政仍以興利除害之事補偏救弊之方隨詔以頒於戲秉籙握樞必因時而建號施仁發政期與物以更新敷宣愾惻之辭表著憂勞之意凡在臣庶體予至懷詔安撫壽春府軍民甲午以阿里不哥反詔赦天下乙未立十路宣撫司以賽典赤李德輝為燕京路宣

撫使徐世隆副之宋子貞為益都濟南等路宣撫使王磐副之河南路經畧使史天澤為河南宣撫使楊果為北京等路宣撫使趙昞副之張德輝為平陽太原路宣撫使謝瑄副之孛魯海牙劉肅並為真定路宣撫使姚樞為東平路宣撫使張肅副之中書左丞張文謙為大名彰德等路宣撫使游顯副之粘合南路宣撫使以汪惟正為鞏昌等處便宜都總帥虎蘭箕為鞏昌路元帥詔諭成都路侍郎張威安撫元忠綿資邛彭等州西川潼川隆慶順慶等府及各處山

若歸附官吏皆給宣命金符有差詔平陽京兆兩路
宣撫司僉兵七千人於延安等處守隘以萬戶鄭鼎
昔刺忙古帶領之貧不能應役者官為資給徵諸路
兵三萬駐燕京近地命諸路市馬萬匹送開平府以
總帥汪良臣統陝西漢軍於沿河守隘立望雲驛非
軍事毋得輒入熒惑入南斗留五十餘日六月戊戌
詔燕京西京北京三路宣撫司運米十萬石輸開平
府及撫州沙井靖州魚兒灤以備軍儲以李壇為江
淮大都督劉太平等謀反事覺伏誅并誅乞帶不花
於東川明里火者於西川漢乙巳李壇言獲

宋諜者言賈似道調兵聲言攻漣州遣人覘之見許
浦江口及射陽湖兵船二千艘宜繕理城塹以備罷
阿蓋帶兒所簽解鹽戶軍百人壬子詔陝西四川宣
撫司八春節制諸軍乙卯詔東平路萬戶嚴忠濟等
發精兵一萬五千人赴開平乙丑以石長不為大理
國總管佩虎符詔十路宣撫司造戰襖裘帽各以萬
計輸開平是月召真定劉郁邢州郝子明彰德胡祇
通燕京馮渭王光益楊恕李彥通趙和之東平韓文
獻張昉等乘傳赴闕高麗國王王僖遣其子永安公
僖判司宰事韓即來賀即位以國王封冊王印及虎

符賜之秋七月戊辰敕燕京北京西京真定平陽大名東平益都等路宣撫司造羊裘皮帽袴靴皆以萬計輸開平己巳以萬戶史天澤扈從先帝有功賜銀萬五千兩遣靈州種田民還京兆庚午賜山東行省大都督李壇金符二十銀符五俾給所部有功將士癸酉以燕京路宣慰使馮馮行中書省事燕京路宣慰使趙璧平事政事張啟元叅知政事王鶚翰林學士承旨兼修國史河南路宣撫使史天澤兼江淮諸翼軍馬經畧使丙子詔中書省給諸王塔察兒益都平州封邑歲賦金帛并以諸王白虎襲刺門所屬民

戶人匠歲賦給之詔造中統元寶真交鈔立互市于穎州漣水光化軍北京路都元帥阿海乞免所部軍士征徭從之宋兵攻邊城詔遣太丑怯列忙古帶率所部合兵擊之下詔褒賞行省大都督李壇帝自將討阿里不哥敕劉天麟規措中都析津驛傳馬八月丙午授中書左丞行大名等路宣撫使張文謙虎符丁未詔都元帥紐璘所過毋擅搖掠官吏己酉立秦蜀行中書省以京兆等路宣撫使廉希憲為中書省右丞行省事宋兵臨漣州李壇乞諸道援兵癸丑賜必闡赤塔刺渾銀二千五百兩李壇乞遣將益兵渡淮

攻宋以方遣使脩好不從癸亥澤州潞州旱民饑敕賑之九月丁卯帝在轉都兒哥之地以阿里不哥遺命下詔諭中外乙亥李璫復請攻宋復諭止之壬午初置拱衛儀仗是月阿藍荅兒率兵至西涼府與渾都海軍合詔諸王合丹合必赤與總帥汪良臣等率師討之丙戌大敗其軍于姑威斬阿藍荅兒及渾都海西土悉平冬十月丁未李璫言宋兵復軍于漣州癸丑初行中統寶鈔戊午車駕駐昔光之地命給官錢雇在京橐駝運米萬石輸行在所十一月戊子發常平倉賑益都濟南濱棣饑民十二月丙申以禮部

郎中孟甲禮部員外郎李文俊使安南大理乙巳李璫上將士功命璫以益都官銀賞之帝至自和林駐蹕燕京近郊始制祭享太廟祭器法服以梵僧八合思八為帝師授以玉印統釋教立仙音院復改為玉宸院括樂工立儀鳳司又立符寶局及御酒庫群牧所升衛輝為總管府賜親王穆哥銀二千五百兩諸王按只帶忽刺忽兒合丹忽刺出勝納合兒銀各五千兩文綺帛各三百匹金素半之諸王塔察阿木魯鈔各五十九錠有奇綿五千九十八斤絹五千九十八匹文綺三百匹金素半之海都銀八百三十三兩

文綺五十四金素半之觀兒赤也不干銀八百五十
兩兀魯忽帶銀五千兩文綺三百匹金素半之只必
帖木兒銀八百三十三兩兀魯忽銀五千兩文
綺三百匹金素半之都魯牙忽銀八百三十三兩特
賜綿五十斤阿只吉銀五千兩文綺三百金素半之
先朝皇后帖古倫銀二千五百兩羅絨等折寶鈔二
十三錠有奇皇后斡者思銀二千五百兩兀魯忽乃
妃子銀五千兩自是歲以為常

二年春正月辛未夜東北赤氣照人大如席乙酉宋
兵圍漣州己丑李璫率將士迎戰敗之賜詔獎諭給

金銀符以賞將士庚寅璫擅發兵修葺都城塹二月

丁酉太陰掩昴己亥宋兵攻漣水命阿木等帥兵赴之

丙午車駕幸開平詔減免民間差發罷守隘諸軍

蜀行省借民錢給軍以今年稅賦償之免平陽太原

軍站戶重科租稅丁未詔行中書省平章禡禡及王

文統等率各路宣撫使赴闕丁巳李璫破宋兵于沙

湖堰三月壬戌朔日有食之夏四月丙午詔軍中所

俘儒士聽贖為民辛亥遣弓工徃教鄯闡人為弓乙

卯詔十路宣撫使量免民間課程命宣撫司官勸農

桑抑游惰禮高年問民疾苦舉文學才識可以從政

及茂才異等列名上聞以聽擢用其職官污濫及民不孝悌者量輕重議罰辛酉詔太康弩軍二千八百人戍蔡州以禮部郎中劉方使大理等國五月乙丑禁使臣毋入民家令止頓析津驛遣崔明道李全義爲詳問官詣宋淮東制司訪問國信使郝經等所在仍以稽留信使侵擾疆場詰之庚辰敕使臣及軍士所過城邑官給廩餼毋擾于民丁亥申嚴沿邊軍民越境私商之禁唐慶子政臣入見詔復其家弛諸路山海之禁禁私殺馬牛申嚴越境私商販馬疋者罪死以河東經畧宣撫使史天澤爲中書右丞相河東軍民並聽節制詔成都路置惠民藥局遣王祐於西川等路採訪醫儒僧道六月癸巳括漏籍老幼等戶協濟編戶賦稅丙申賜新附人王顯忠王誼等衣物有差李瓊遣人獻漣水捷罷諸路拘叔孛蘭奚禁諸王擅遣使招民及徵私錢戊戌太陰犯角詔諭十路宣撫司并管民官定鹽酒稅課等法癸卯以嚴忠範爲東平路行軍萬戶兼管民總管仍諭東平路達魯花赤等官並聽節制詔定中外官所乘馬數各有差乙巳賑火少里驛戶之乏食者賞欽察所部將校有功者銀二千五百兩及幣帛有差己酉命實默仍翰林

侍講學士默與王鶚面論王文統不宜在相位薦許
衡代之帝不憚而罷辛亥轉懿州米萬石賑親王塔
察兒所部饑民賜親王合丹所部軍幣帛九百匹布
千九百匹乙卯敕平陽路安邑縣蒲萄酒自今毋貢
詔宣聖廟及管内書院有司歲時致祭月朔釋奠禁
諸官負使臣軍馬毋得侵擾褻瀆違者加罪丙辰以
汪良臣同簽鞏昌路便宜都總帥凡軍民官並聽良
臣節制丁巳敕諸路造人馬甲及鐵裝具萬二千輸
開平戊午詔毋收衛輝懷孟賦稅以償其所借芻粟
庚申宋瀘州安撫使劉正舉城降以整行夔府路中

書省兼安撫使佩虎符仍諭都元帥紐璘等使存恤
其民賜故金翰林修撰魏璠謚靖肅秦蜀行省言青
居山都元帥欽察等所部將校有功詔降虎符一金
符五銀符五十七令行省銓定職名給之城臨洮陞
真定鼓城縣爲晉州以鼓城安平武強饒陽隸焉賜
僧子聰懷孟邢州田各五十頃罷金銀銅鐵丹粉錫
碌坑冶所役民夫及河南舞陽晝戶藤花戶還之州
縣賜大理國主改實虎符優詔撫諭之命李壇領益
都路鹽課出工局繡女聽其婚嫁懷孟廣濟渠提舉
王允中大使楊端仁鑿沁河渠成溉田四百六十餘

所高麗國王僖更名植遣其世子懋奉表來朝命宿
衛將軍李里察禮部郎中高逸民持詔往諭仍以玉
帶賜之以不花爲中書右丞相耶律鑄爲中書左丞
相張啓元爲中書右丞授管領崇慶府黎雅威茂邛
灌七處軍民小太尉虎符秋七月辛酉朔立軍儲都
轉運使司以馬月合乃爲使周錯爲副使癸亥初立
翰林國史院王鶚請修遼金二史又言唐太宗置弘
文館宋太宗設內外學士院今宜除拜學士院官作
養人才乞以右丞相史天澤監修國史左丞相耶律
鑄平章政事王文統監修遼金史仍採訪遺事並從

之賑和林饑民賞鞏昌路總帥汪惟正將校斬渾都
海功銀二千五百兩馬價銀四千九百兩諸王昌童
招河南漏籍戶五百命什之有司命總管王青製神
臂弓柱子弓諭河南管軍官於近城地量存牧場餘
聽民耕巴思荅兒乞於高麗鴨綠江西立互市從之
乙丑遣使持香幣祀嶽瀆丁丑渡江新附民留屯蔡
州者徙居懷孟貸其種食以萬家奴爲安撫高麗軍
民達魯花赤賜虎符庚辰西京宣德隕霜殺稼辛巳
詔許衡即其家教懷孟生徒命西京宣撫司造船備
西夏漕運壬午遣納速刺丁孟甲等使安南乙酉以

牛驛雨雪道途泥濘改立水驛己丑命鍊師王道歸
於真定築道觀賜名玉華諭將士舉兵攻宋詔曰朕
即位之後深以戢兵爲念故年前遣使於宋以通和
好宋人不務遠圖伺我小隙反啓邊釁東剽西掠曾
無寧日朕今春還宮諸大臣皆以舉兵南伐爲請朕
重以兩國生靈之故猶待信使還歸庶有悛心以成
和議留而不至者今又半載矣往來之禮遽絕侵擾
之暴不已彼嘗以衣冠禮樂之國自居理當如是乎
曲直之分灼然可見今遣王道貞往諭卿等當整爾
士卒礪爾戈矛矯爾弓矢約會諸將秋高馬肥水陸
分道而進以爲問罪之舉尚賴宗廟社稷之靈其克
有勲卿等當宣布朕心明諭將士各當自勉毋替朕
命鄂州青山磯泝黃洲所招新民遷至江北者設官
領之救懷孟牧地聽民耕墾八月壬辰賜故金補闕
李大節謚貞肅丁酉命開平守臣釋奠于宣聖廟戊
戌以燕京等路宣撫使賽典赤爲平章政事勅以賀
天爵爲金齒等國安撫使忽林伯副之仍招諭使安
其民己亥諭武衛軍都指揮使李伯祐汰本軍疲老
者選精銳代之給海青銀符一有奏馳驛以聞辛丑
以宣撫使粘合南合爲中書右丞濶濶爲中書左丞

賈文備為開元女直水達達等處宣撫使賜虎符以
宋降將王青為總管教武衛軍習射乙巳禁以俘掠
婦女為娼丙午太白犯歲星以許衡為國子祭酒丁未以
姚樞為大司農竇默仍翰林侍講學士先是以樞為
太子太師衡為太子太傅默為太子太保樞等以不
敢當師傅禮皆辭不拜故復有是命初立勸農司以
陳邃崔斌成仲寬粘合從中為濱棣平陽濟南河間
勸農使李士勉陳天錫陳膺武忙古帶為邢洺河南
東平涿州勸農使己酉命大名等路宣撫使歲給翰
林侍講學士竇默太醫副使王安仁衣糧賜田以為
永業甲寅賞董文炳所將渡江及北征有功者二十
二人銀各五十兩封順天等路萬戶張柔為安肅公
濟南路萬戶張榮為濟南公陝西四川行省乞就決
邊方重刑不允詔陝西四川行省存恤歸附軍民詔
自今使臣有矯稱上命者有司不得聽受諸王后妃
公主駙馬非聞奏不許擅取官物賜慶壽寺海雲寺
陸地五百頃勅西京運糧于沙井北京運糧于魚兒
泊立檀州驛頒斗斛權衡賑桓州饑民賜諸王塔察
兒金千兩銀五千兩幣三百匹給阿石寒甲價銀千
二百兩核實新增戶口措置諸路轉輸法命劉整招

懷慶府嘉定等處民戶宋私商七十五人入宿州議
置于法詔宥之還其貨聽榷場貿易仍檄宋邊將還
北人之留南者九月庚申朔詔以忽突花宅為中書
省署奉遷祖宗神主于聖安寺癸亥邢州安撫使張
耕告老詔以其子鵬翼代之武衛親軍都指揮使李
伯祐董文炳言武衛軍疲老者乞補換仍存恤其家
從之丙寅詔以粘合南合行中興府中書省戊辰大
司農姚樞請以儒人楊庸教孔顏孟三氏子孫東平
府詳議官王鏞兼充禮樂提舉詔以庸為教授以鏞
兼太常少卿辛未以清滄鹽課銀償往歲所貸民

錢給公費者置和糴所于開平以戶部郎中宋紹祖
為提舉和糴官丙子諭諸王駙馬凡民間詞訟無得
私自斷決皆聽朝廷處置河南民王四妻靳氏一產
三男命有司量給贍養敕今歲田租輸沿河近倉官
為轉漕不可勞民癸未以甘肅等處新羅兵革民務
農安業者為戍兵所擾遣阿沙焦端義往撫治之以
海青銀符二金符十給中書省量軍國事情緩急付
乘驛者佩之以開元路隸北京宣撫司真定路官民
所貸官錢貧不能償詔免之王鶚請於各路選委博
學老儒一人提舉本路學校特詔立諸路提舉學校

官以王萬慶欽等三十人充之救燕京順天等路
續製人甲五千馬甲及鐵裝具各二千冬十月庚寅
朔詔鳳翔府種田戶隸平陽兵籍毋令出征務耕屯
以給軍餉辛卯陝西四川行省上言軍務急速若待
奏報恐失事機詔與都元帥紐璘會議行之遣道士
些言洞春代祀東海廣德王廟壬辰救火兒赤奴懷率
所部畧地淮西丁酉救愛亦伯等及陝西宣撫司檢
覈不魯歡阿藍塔兒所貸官銀庚子以右丞張啓元
行中書省於平陽太原等路括西京兩路官民有壯
馬皆從軍令宣德州楊庭訓統之有力者自備甲仗
無力者官與供給兩路奧魯官并在家軍人凡有馬
者並付新軍劉總管統領昂吉所管西夏軍并豐州
葦麻林夏水阿剌渾皆備鞍馬甲仗及孛魯歡所管
兵凡徒行者市馬給之並令從軍違者以失誤軍期
論修燕京舊城命平章政事趙壁左三部尚書怯烈
明率蒙古漢軍駐燕京近郊太行一帶東至平灤西
控關陝應有險阻於附近民內選諳武事者修立堡
寨守禦以河南屯田萬戶史權為江漢大都督依舊
戍守又選銳卒三千付史樞管領於燕京近郊屯駐
壬寅命亳州張柔歸德邸淡睢州王文幹水軍解成

張榮實東平嚴忠嗣濟南張宏七萬戶以所部兵來會罷東平會計前任官侵用財賦甲辰宋兵攻瀘州劉整擊敗之詔賞整銀五千兩幣帛二千匹失里荅劉元振守禦有功各賞銀五百兩將士銀萬兩幣帛千匹乙巳詔指揮副使鄭江將千人赴開平指揮使董文炳率善射者千人由魚兒泊赴行在所指揮使李伯祐率餘兵屯潮河川壬子詔霍木海乞帶等自得勝口至中都預備糧餉芻粟丙辰詔平章政事塔察兒率軍士萬人由古北口西便道赴行在所十一月壬戌大兵與阿里不哥遇於昔木土腦兒之地諸

王合丹等斬其將合丹火兒亦及其兵三千人塔察兒與合必赤等復分兵奮擊大破之追北五十餘里帝親率諸軍以躡其後其部將阿脫等降阿里不哥北遁庚午太陰犯昴壬申詔免今年賦稅癸酉駐蹕帖買和來之地以尚書怯烈門平章趙璧兼大都督率諸軍從塔察兒北上分蒙古軍爲二怯烈門從麥肖出居庸口駐宣德德興府訥懷從阿忽帶出古北口駐興州帝親將諸萬戶漢軍及武衛軍由檀順州駐潮河川敕官給芻糧毋擾居民罷十路宣撫司止存開元路命諸路市馬二萬五千餘匹授蒙古軍之無

馬者丁丑徵諸路宣撫司官赴中都移蹕於速木合
打之地詔漢軍屯懷來晉山鷹坊阿里沙及阿散兄
弟二人以擅離扈從伏誅十二月庚寅詔封皇子真
金爲燕王頒中書省事辛卯熒惑犯房壬辰熒惑犯
鈞鈴癸巳以昌撫蓋利泊等處荐權兵革免今歲租
賦甲午師還詔撤所在戍兵放民間新簽軍命太常
少卿王鏞教習大樂壬寅以隆寒命諸王合必赤所
部軍士無行帳者聽舍民居命陝蜀行中書省給綏
德州等處屯田牛種農具初立宮殿府秩正四品專
職營繕立尚食局尚藥局初設控鶴五百四人以劉
德爲軍使領之立異樣局遼魯花赤掌御用織造秩
正三品給銀印賜諸王金銀幣帛如歲例是歲天下
戶一百四十一萬八千四百九十有九斷死罪四十
六人

本紀卷第四

本紀卷第五

元史五

翰林學士亞中矣知制誥兼修國史臣宋濂翰林待制承直郎兼國史院編修官臣王禕等奉勅修

世祖二

三年春正月癸亥修宣聖廟成庚午罷高麗互市諸王塔察兒請置鐵冶從之請立互市不從忽刺忽兒所部民饑罷上供羊命銀冶戶七百河南屯田戶百四十賦稅輸之州縣命匠戶為軍者仍為軍其軍官當考第富貧存恤無力者耶律鑄詣北京餉諸王軍仍遣宣撫使柴禎等增價糴米三萬石益之賜高麗

國曆辛未禁諸道戍兵及勢家縱畜牧犯桑棗禾稼者癸酉以軍興人民勞苦勅停公私逋負毋徵癸未賜廣寧王瓜都駝鈕金鍍銀印及諸王合必赤行軍印宋制置使賈似道以書誘摠管張元等李壇獲其書上之丙戌命江漢大都督史權亳州萬戶張弘彥將兵八千赴燕脩宮懸鍾磬樂舞籥翟凡用三百六十二人高麗遣使奉表來謝優詔答之李壇質子彥簡逃歸二月丁亥朔元籍軍竄名爲民者命有司還正之括諸道逃亡軍已丑李壇反以漣海三城獻于宋盡殺蒙古戍軍引麾下趨益都前宣撫副使土磐

脫身走至濟南驛召磐令姚樞問計磐對豎子狂妄即成擒耳帝然之庚寅宋兵攻新蔡辛卯始定中外官俸命大司農姚樞講定條格甲午李壇入益都發府庫犒其將校乙未詔諸道以今歲民賦市馬丙申郭守敬造寶山漏成徙至燕京以興松雲三州隸上都辛丑李壇遣騎寇蒲臺癸卯詔發兵討之以趙壁爲平章政事修深冀南宮棗強四城甲辰發諸蒙古漢軍討李壇命水軍萬戶解成張榮實大名萬戶王文幹及萬戶嚴忠範會東平濟南萬戶張宏歸德萬戶邸泱武衛軍礮手元帥薛軍勝等會濱棣詔濟南

路軍民萬戶張宏濱棣路安撫使韓世安各修城塹
盡發管內民爲兵以備召張柔及其子弘範率兵二
千詣京師丙午命諸王合必赤摠督諸軍以不只愛
不干及趙璧行中書省事於山東宋子貞叅議行中
書省事以董源高逸民爲左右司郎中許便宜從事
真定順天河間平灤大名邢州河南諸路兵皆會濟
南以中書左丞闊闊尚書怯烈門宣撫游顯行宣慰
司於大名洛滋懷孟彰德衛輝河南東西兩路皆隸
焉己酉王文統坐與李壇同謀伏誅仍詔諭中外王
演等以妖言誅辛亥勅元帥阿海分兵戍平灣海口
及東京廣寧懿州以餘兵詣京師詔諸道括逃軍還
屯田嚴其禁壬子李壇據濟南癸丑詔大名洛磁彰
德衛輝懷孟河南真定邢州順天河間平灤諸路皆
籍兵守城宋兵攻滕州丙辰詔拔都抹台將息州戍
兵詣濟南移其民於蔡州東平萬戶嚴忠範留兵戍
宿州及蘄縣以餘兵自隨三月戊午有旨非中書省
文移及兵民官申省者不許入遞己未括木速蠻畏
吾兒也里可溫答失蠻等戶丁爲兵庚申括北京鷹
坊等戶丁爲兵蠲其賦令趙炳將之辛酉宗拔突言
河南有自願從軍者命即令將之遣鄭鼎贍思丁答

里帶三島行宣慰司事于平陽太原簽見任民官及捕鷹坊人匠等軍徒弘州錦工繡女于京師勅河東兩路元括金州兵付鄭鼎將之詔以平章政事禡禡廉希憲叅政商挺斷事官麥肖行中書省于陝西四川獲私商南界者四十餘人命釋之勅燕京至濟南置海青驛凡八所壬申命戶部尚書劉肅專職鈔法平章政事賽典赤兼領之以撒吉思柴禎行宣慰司事于北京免今歲絲銀止輸田租癸酉命史樞阿朮各將兵赴濟南遇李壇軍邀擊大破之斬首四千壇退保濟南乙亥宋將夏貴攻符離戊寅萬戶韓世安率鎮撫馬興千戶張濟民大破李壇兵於高苑獲其權府傳珪賜濟民興金符詔以李壇兵敗諭諸路禁民間私藏軍器壬午始以畏吾字書給驛璽書免西京今年絲銀稅甲申免高麗酒課乙酉宋夏貴攻蘄縣諭諸路管民官毋令軍馬使臣入州城村居鎮市擾及良民夏四月丙戌朔大軍樹柵鑿塹圍壇于濟南丁亥詔博興高苑等處軍民嘗爲李壇脅從者並釋其罪庚寅命怯烈門安撫張耕分邢州戶隸兩峇刺罕辛卯修河中禹廟賜名建極宮壬辰以大梁府渠州路軍民總帥蒲元圭爲東燕路經畧使丙申宋

華路分湯太尉攻徐邳二州詔分張柔軍千人還戍
亳州庚子江漢大都督史權以趙百戶絜衆逃歸斬
之詔自今部曲犯重罪鞠問得實必先奏聞然後寘
諸法詔安輯徐邳民禁征戍軍士及勢官毋縱畜牧
傷其禾稼棄棗以米千石牛三百給西京蒙古戶癸
卯宋兵攻亳州甲辰命行中書省宣慰司諸路達魯
花赤管民官勸誘百姓開墾田土種植棄棗不得擅
興不急之役妨奪農時乙巳以北京廣寧豪懿州軍
興勞弊免今歲稅賦命諸路詳讞寃獄詔河東兩路
并平陽太原路達魯花赤及兵民官撫安軍民各安
生業毋失歲計丁未李璫遣柴牛兒招諭部民盧廣
廣縛以獻殺之以廣權威州軍判兼捕盜官戊申賜
諸王也相哥金印庚戌賜諸王合必赤金銀海青符
各二免松州興州望雲州新舊差賦以望雲松山興
州課程隸開平府壬子勅拈軍情毋行望雲驛乙卯
河南路王豁子張無僧杜信等謀爲不軌並伏誅詔
右丞相史天澤專征諸將皆受節度五月戊午蘄縣
陷權萬戶李義千戶張好古死之庚申築環城圍濟
南壇不復得出詔撒吉思安撫益都路百姓各務農
功仍禁蒙古漢軍剽掠癸亥史權妄奏徐邳總管李

杲哥完復邳州城詔由杲哥以下並原其罪時宋將夏貴攻邳州杲哥出降貴既去杲哥自陳能保全州城史權以聞故有是命甲子宋兵攻利津縣蠲濱棣今歲田租之半東平蠲十之三自燕至開平立牛驛給鈔市車牛戊辰以右丞相忽魯不花兼中書省都斷事官賜虎符真定順天邢州蝗以平章政事賽典赤兼領工部及諸路工作以孟烈所獻蹶張弩藏于中都丙子晉山至望雲立海青驛丁丑李杲哥等伏誅命史天澤選考徐邳總管甲申真定路不眼里海牙擅殺造偽鈔者三人詔詰其違制之罪西京宣德

咸寧龍門霜天順平陽河南真定雨雹東平濱棣旱詔覈實逃戶輸納絲銀稅租戶口增者賞之隱匿者罪之逃民苟免差稅重加之罪大司農姚樞辭赴省議事帝勉留之命樞與左三部尚書劉肅依前商議中書省事六月乙酉朔宋兵攻滄州雅州瀘山民既降復叛命誅其首亂者七人餘令安業割遼河以東隸開元路戊子濱棣安撫使韓安世敗宋兵于濱州丁河口己丑遣樞察兒帥兵擊宋軍仍安諭瀕海軍民乙未禁女直侵軼高麗國民其使臣往還官爲護送命婆娑府屯田軍移駐鴨綠江之西以防海道丙

申高麗國王王植遣使來貢壬寅陝西行省言西京
宣德太原匠軍困乏乞以民代之有旨軍籍已定不
宜動搖宜令貧富相資果甚貧者令休息一歲癸卯
太原總管李毅奴哥違魯花赤戴曲薛等領李壇偽
檄傳行旁郡事覺誅之勅武寧軍歲輸所產鐵河西
民及諸王忽撒吉所部軍士乏食給鈔賑之壬子申
嚴軍官及兵伍擾民之禁癸丑立小峪蘆子寧武軍
赤泥泉鐵冶四所東平嚴忠濟向爲民貸錢輸賦四
十二萬七千四百定借用課程鈔本鹽課銀萬五千
餘兩詔勿徵秋七月戊午復蒙古軍站戶差賦農

包銀徵其半停戶止令輸絲民當輸賦之月毋徵私
債勅私市金銀應支錢物止以鈔爲准丙寅賜夔州
路行省楊大淵金符十銀符十九賞麾下將士別給
海青符二事有急速馳以上聞立槍杆嶺驛以便轉
輸癸酉甘州饑給銀以賑之甲戌李壇窮蹙入大明
湖投水中不即死獲之併蒙古軍囊家伏誅體解以
徇戊寅以夔府行省劉整行中書省於成都潼川兩
路仍賜銀萬兩分給軍士之失業者八月己丑郭守
敬請開玉泉水以通漕運廣濟河渠司王允中請開
邢洛等處漳滏澧河達泉以溉民田並從之甲午博

都歡等奏請以宣德州德興府等處銀冶付其匠戶
歲取銀及石綠丹粉輸官從之丙午立諸路醫學教
授戊申勅王鶚集廷臣商榷史事鶚等乞以先朝事
蹟錄付史館河間平灤廣寧西京宣德北京隕霜害
稼九月戊午亳州萬戶張弘略破宋兵于蘄縣復宿
蘄二城以侍衛親軍都指揮使董文炳兼山東路經
畧使收集益都舊軍充武衛軍戍南邊詔益都行省
大都督撒吉思與董文炳會議兵民籍每十戶惟取
其二充武衛軍其海州東海漣水移入益都者亦隸
本衛己未罷霸州海青驛安南國陳光炳遣使貢方

物壬戌改邢州為順德府己未安撫司洛磁威三州隸
焉聽太原民食小鹽歲輸銀七千五百兩己巳以馬
月合乃餉軍功授禮部尚書賜金符壬申授安南國
王陳光炳及達魯花赤訥刺丁虎符勅濟南官吏凡
軍民公私逋負權閣毋徵癸酉都元帥闊闊帶卒于
軍以其兄阿木代之授虎符將南邊蒙古漢軍閏月
甲申朔沙肅二州乏食給米鈔賑之丁亥立古北口
驛己丑濟南民饑免其賦稅免諸路軍戶他徃庚寅
勅京師順州至開平置六驛辛卯嚴忠範奏請補東
平路廟學太常樂工從之勅武衛軍及黑軍會于京

師庚子中翼千戶九住破宋兵于肅腦山庚戌發粟三十萬賑濟南饑民冬十月丙辰放金州所屯軍士二千人及大明河南新簽防城軍爲民庚申分益都軍民爲二董文炳領軍撤吉思治民禁諸王使臣師旅敢有恃勢擾民者所在執以聞詔以李璫所掠民馬還其主以郝經劉人傑使宋未還廩其家中書省奏與宋互市庶止私商及復逋民之陷于宋者且覘漣海二州不允以劉仁傑不附李璫擢益都路總管仍以金帛賜之壬戌授益都行中書省都督府所統州郡官金符十七銀符十一乙丑詔禁京畿改獵丙寅

寅分東西兩川都元帥府爲二以帖的及劉整等爲都元帥及左右副都元帥詔責高麗欺慢之罪又詔賜高麗王植曆以戰功賞渠州達魯花赤王璋等金五十兩銀一千五百五十兩賞閻蓬等路都元帥合州戰功銀五千兩丁卯詔鳳翔府屯田軍隸兵籍仍屯田鳳翔放刁國器所簽平陽軍九百一十五人爲民閻蓬廣安順慶夔府等路都元帥欽察成青居山請益兵詔陝西行省及鞏昌總帥汪惟正以兵益之庚戌辰楊大淵乞於利州大安軍以鹽易軍糧從之庚午敕鞏昌總帥汪惟正將成青居軍還屯田利州乙

亥分中書左右部丁丑敕宿州百戶王達等所擒宋王用夏珍等八人赴京師命百家奴所將質子軍入侍戍寅命不里刺所統固安平灤質子軍自益都徙還故地詔益都府路官吏軍民為李壇脅從者並赦其罪敕萬戶嚴忠範修復宿州蘄縣萬戶忽都虎懷都何總管修完邳州城郭十一月乙酉太白犯鈞鉞丁亥敕聖安寺作佛頂金輪會長春宮設金籙周天醮辛丑日有背氣重暈三珥敕濟南人民為李壇裨校掠取財物者詣都督撒吉思所訟之真定民郝興離殺馬忠忠子榮受興銀令興代其軍役中書省以

榮納賂忘讎無人子之道杖之沒其銀事聞詔論如法有司失出之罪俾中書省議之三以沽竈戶經宋兵焚掠免今年租賦汰少府監工匠存其良者千二百戶遣官審理陝西重刑敕河西民徙居應州其不能自贍者百六十戶給牛具及粟麥種仍賜布人二匹乙巳詔都元帥阿木分兵三千人同阿鮮不花懷都兵馬復立宿州蘄縣邳州有旨諭史天澤朕或乘怒欲有所誅殺卿等宜遲留一二日覆奏行之丙午詔特徵人負宜令乘傳戍申陞撫州為隆興府以昔刺幹脫為揔管割宣德之懷安天成及威寧高原隸

馬十二月甲寅封皇子真金爲燕王守中書令丙辰
敕諸王塔察兒等所部獵戶止收包銀其絲稅輸之
有司立河南山東統軍司以塔刺渾火兒赤爲河南
路統軍使盧昇副之東距亳州西至均州諸萬戶隸
焉茶不花爲山東路統軍使武秀副之西自宿州東
至寧海州諸萬戶隸焉罷各路急遞鋪丁巳立十路
宣慰司以真定路選魯花赤趙璿等爲之己未犯罪
應死者五十三人詔重加詳讞辛酉詔給懷州新民
耕牛二百俾種水田立諸路轉運司以燕京路監權
官曹澤等爲之使癸亥享太廟詔各路總管兼萬戶
者止理民事軍政勿預其州縣官兼千戶百戶者仍
其舊乙丑復立息州城以安其民召真定順德等路
宣慰使王盤乘傳赴京師丙寅申嚴屠殺牛馬之禁
己巳詔諸路管民總管子弟有分管州府司縣及鷹
坊人匠諸色事務者罷之壬申遣使收輯諸路軍民
官海青牌及驛券戊寅詔諸路管民官理民事管軍
官掌兵戎各有所司不相統攝作佛事於昊天寺七
晝夜賜銀萬五千兩割北京興州隸開平府建行宮
于興隆路陞太原臨泉縣爲臨州降寧陵爲下縣仍
隸歸德賜諸王金銀幣帛如歲例是歲天下戶一百

四十七萬六千一百四十六斷死罪六十六人

四年春正月乙酉禁蒙古軍馬擾民宋賈似道遣楊琳賈空名告身及蠟書金幣誘大獲山楊大淵南歸大淵部將執琳詔誅之以宋忽兒滅里及沙只回回鷹坊等兵戍商州藍田諸隘軍民官各從統軍司及宣慰司選舉岳天輔乞復立息州不允丙戌以姚樞爲中書左丞改諸路監榷課稅所爲轉運司甲午給公主拜忽符印其所屬設達魯花赤給鈔賑益都路貧民之無牛者立十路輿魯總管丁酉益都路行省大都督撒吉思上李壇所傷漣水軍民及陷宋蒙古女直

探馬赤軍數男女九千九百二十二人癸卯領部阿合馬請興河南等處鐵冶及設東平等路巡禁私鹽軍從之召商挺趙良弼赴闕乙巳敕李平陽以所部西川出征軍士戍青居山其各翼軍在青居山者悉還成都詔陝西行省塔刺海等收恤離散軍戶詔以諸路漢軍輿魯毋隸各萬戶管領其科徵差稅山東河南隸統軍司東西兩川隸征東元帥府陝西隸行戶部凡輿魯官內有各萬戶弟男及私人皆罷之敕揔帥汪忠臣都元帥帖的及劉整等益兵付都元帥欽察戍青居山仍以解州鹽課給軍糧丙午詔諸

翼萬戶簡精兵四千充武衛軍罷古北口新置驛增萬戶府監戰一負參議一負以馬合麻所俘濟南老僧口之民文面為奴者付元籍為民汪忠臣史權械繫宋謀者六人至京師有旨釋之辛亥申禁民家兵器及蒙古軍擾民者陵州違魯花赤蒙哥戰死濟南以其子忙兀帶襲職召雲頂山侍郎張威赴闕二月壬子朔命河東宣慰司市馬百二十九匹賜諸王八刺軍士之無馬者甲寅詔諸路官負子弟入質以高麗不答詔書詰其使者以民杜了翁先朝舊功復其家庚申賞萬戶怯來所部將士討李壇有功者銀二

千七百五十兩甲子車駕幸開平以王德素充國信使劉公諒副之使于宋致書宋主詰其稽留郝經之故詔諸路置局造軍器私造者處死民間所有不輸官者與私造同三月戊子沂州胡郎使范同知陷于宋命存恤其家或言其嘗為宋兵嚮導乃分其妻孥資產賜有功將士辛卯敕撒吉思招集益都逃民命董文炳以所獲宋謀及俘八十一人赴隆興府聽諸路獵戶及捕盜巡鹽者執弓矢壬辰遣扎馬刺丁和糴東京已亥諸路包銀以鈔輸納其絲料入本色非產絲之地亦聽以鈔輸入凡當差戶包銀鈔四兩每

十戶輸絲十四斤漏籍老幼鈔三兩絲一斤庚子亦
黑迭兒丁請修瓊華島不從壬寅關東蒙古漢軍官
未經訓敕者令各乘傳赴開平癸卯初建太廟乙巳
賜迭怯那延等銀七千九十兩命北京元帥阿海發
漢軍二千人赴開平己酉高麗國王王植遣其臣朱
英亮入貢上表謝恩復立宿州夏四月庚戌朔以漏
籍戶一萬一千八百附籍戶四千三百於各處起治
歲課鐵四百八十萬七千斤癸丑選益都兵千人充
武衛軍甲寅償河西阿沙賑贍所部貧民銀三千七
百兩己未以完顏端田宅賜益都千戶傳國忠國忠

父天祐為端所殺故命以其田宅賜之宣德至開平
置驛罷開元路宣慰司丙寅西京武州隕霜殺稼戊
寅召竇默許衡乘駟赴開平諸王阿只吉所部貧民
遠徙者賜以馬牛車幣以東平為軍行蹂踐賑給之
改滄清深鹽提領所為轉運司王鶚請延訪太祖事
蹟付史館五月癸未詔北京運米五千石赴開平其
車牛之費並從官給乙酉初立樞密院以皇子燕王
守中書令兼判樞密院事戊子陞開平府為上都其
達魯花赤兀良吉為上都路達魯花赤總管董銓為
上都路總管兼開平府尹辛卯詔立燕京平準庫以

均平物價通利鈔法乙未敕商州民就戍本州毋禁
弓矢丙申立上都馬步驛丁酉以元帥楊大淵張大
悅復神山有功降詔獎諭戊戌以禮部尚書馬月合
乃鯨領潁州光化互市及領已括戶三千興煇鐵冶
歲輸鐵一百三萬七千斤就鑄農器二十萬事易粟
四萬石輸官河南隨處城邑市鐵之家令仍舊鼓鑄
庚子河南路總管劉克興矯制括戶罷其職籍家資
之半陞上都路望雲縣為雲州松山縣為松州賞前
討渾都海戰功撒里都闊闊出等鈔二千一百七十
四錠幣帛一千四百二十四匹六月壬子河間益都燕

京真定東平諸路蝗乙卯以管民官兼統懷孟等軍
俺撒戰歿汴梁命其子忙兀帶為萬戶佩金符戊午
賜線真田戶六百己未賜高麗國王王植羊五百癸
酉賜拜忽公主所部鈔千錠立上都惠民藥局建帝
堯廟於平陽仍賜田十五頃以線真為中書右丞相
塔察兒為中書左丞相秋七月癸未詔諸投下毋擅
勾攝燕京路州縣官吏乙酉禁野狐嶺行營民毋入
南北口縱畜牧損踐桑稼給公主拜忽銀五萬兩合
刺合納銀千兩乙未以故東平權萬戶呂義死王事
賜謚貞節戊戌詔弛河南沿邊軍器之禁陞燕京屬

縣安次爲東安州固安爲固安州河南統軍司言屯田民爲保甲丁壯射生軍凡三千四百人分戍沿邊州郡乞蠲他徭從之庚子詔賜諸王爪都牛馬價銀六萬三千一百兩壬寅詔禁益都路探馬赤擾民以成都經畧司隸西川行院禁蒙古漢軍諸人煎販私鹽詔山東經畧司徒膠萊莒密之民及竈戶居內地中書省臣以妨煮鹽爲言遂令統軍司完復邊戍居民竈戶毋徙詔阿木戒蒙古軍不得以民田爲牧地燕京河間閔平隆興四路屬縣雨雹害稼八月戊申朔詔霍木海總管諸路驛佩金符辛亥置元帥府于

大理詔東平大名河南宣慰司市馬千五百五十匹給阿木等軍陸宣德州爲宣德府隸上都以淄萊登三州爲總管府治淄州命昔撒昔總制鬼國大理兩路兵部郎中劉芳前使大理至吐蕃遇害命恤其家壬子命中書省給北京西京轉運司車牛價鈔彰德路及洛磁二州旱免彰德今歲田租之半洛磁十之六冀州蒙古百戶阿昔等犯鹽禁沒入馬百二十餘匹以給軍士之無馬者甲寅命成都路運米萬石餉潼川給鈔付劉整市牛屯田分劉元禮等軍戍潼川命按敦將之丙辰詔以成都路綿州隸潼川戊午以

阿脫商挺行樞密院於成都凡成都順慶潼川都元帥府並聽節制庚申以史天倪前爲武僊所殺以武僊第賜其子楫癸亥敕京北路給賜劉整第一區田二十頃以夢八刺所部貧乏賜銀七千五百兩給之甲子以西涼經兵居民困弊給鈔賑之仍免租賦三年敕諸臣傳旨有疑者須覆奏丙寅以諸王只必帖木兒部民困乏賜銀二萬兩給之壬申復置急遞鋪濱棣二州蝗真定路旱詔西涼流民復業者復其家三年車駕至自上都九月壬午河南大名兩道宣慰司所獲宋謀王立張達刁俊等十八人遇赦釋免給衣服遣還乙酉立漕運河渠司己丑賜諸王阿只吉所部種食牛具庚寅諭高麗上京等處毋重科斂民招諭濟南濱棣流民遣使徵諸路賦稅錢帛民間所賣布帛有踈薄狹短者禁之冬十月戊午初置隆興路驛十一月甲申詔以歲不登量減阿述法烈各軍行餉東平大名等路旱量減今歲田租丙戌享于太廟以合丹塔察兒王盤張文謙行事高麗國王王植以免置驛籍民等事遣其臣韓就奉表來謝賜中統五年曆并蜀錦一仍命植入朝立御衣尚食二局十二月丁未朔以鳳翔屯軍汪惟正青居等軍刁國器

平陽軍令益都元帥欽察統之戊虎嘯寨甲戌敕駙馬愛不花蒲萄戶依民例輸賦也里可溫答失蠻僧道種田入租貿易輸稅丙子賜諸王金銀幣帛如歲例是歲天下戶一百五十七萬九千一百一十賦絲七十萬六千四百一十斤鈔四萬九千四百八十七錠斷死罪七人

至元元年春正月丁丑朔高麗國王王植遣使奉表來賀壬午敕諸路宣慰司非奉旨無輒入覲以千戶張好古歿王事命其弟好義好禮並襲職為千戶癸巳以益都武衛軍千人屯田燕京官給牛具以鄧州

保甲軍二千三百二十九戶隸統軍司戊戌楊大淵進花羅紅邊緜各百五十段優詔諭之己亥立諸路平準庫癸卯命諸王位下工匠已籍為民者並徵差賦儒釋道也里可溫達失蠻等戶舊免租稅今並徵之其蒙古漢軍站戶所輸租減半西北諸王率部民來歸敕北京西京宣慰司隆興總管府和羅以備糧餉築冷水河城命千戶土虎等戍之罷南邊互市申嚴持軍器販馬越境私商之禁二月辛亥賀福等六人告平陽太原漏籍戶詔賞以官廷臣以非材對給鈔與之敕選儒士編修國史譯寫經書起館舍給俸

以贍之士子修瓊花島發北京都元帥阿海所領軍
疏雙塔漕渠甲寅以故亳州千戶邸閏陷于宋命其
子榮祖襲職丙辰罷陝西行戶部丁卯太陰犯南斗癸
酉車駕幸上都詔諸路總管文權等二十三人赴上
都大朝會弛邊城軍器之禁三月庚辰設周天醮于
長春宮己亥命尚書宋子貞陳時事子貞條具以聞
詔獎諭命中書省議行之辛丑詔四川行院命阿脫
專掌軍政其刑名錢穀商挺任之立漕運司以王光
益爲使夏四月戊申以彰德洛磁路引漳滏洹水灌
田致御河淺澁鹽運不通塞八分渠以復水勢辛亥太陰

犯軒轅御女星壬子東平太原平陽旱分遣西僧祈
雨己卯詔高麗國王王祖來朝上都修世見之禮辛
酉以四川茶鹽商酒竹課充軍糧楊大淵以部前王
仲得宋將督萬壽書殺之詔以其事未經鞠問或墮
宋人行間之計豈宜輒施刑戮詰責大淵仍存恤仲
家御苑官南家帶請修駐蹕涼樓并廣牧地詔涼樓
俟農隙牧地分給農之無田者丁卯追治李璫逆黨
萬戶張邦直兄弟及姜郁李在等二十七人罪戊辰
給新附戍軍糧餉高麗國王王祖遣其臣金祿來貢
五月乙亥詔遣唆脫顏郭守敬行視西夏河渠俾具

圖來上庚辰敕劔州守將分軍守劔門置驛於人頭山丙戌太陰犯房丁亥釋宋私畜四五十七人給糧遣歸其國己丑以平陰縣尹馬欽發私粟六百碩贍饑民又給民粟種四百餘石詔獎諭特賜西錦一端以旌其義乙未初置四川急遞鋪丙申賜諸王欽察銀萬兩濟其所部貧乏者己亥太陰犯昴以中書右丞粘合南合為平章政事印部川六番安撫招討使都王明亞為隣國建都所殺救其子伯佗襲職賜金符六月乙巳召王鶚姚樞赴上都宋制置夏貴率兵欲攻虎窟山救以萬戶石抹兀札刺一軍益欽察戍之戊申

高麗國王王禎來朝秋七月甲戌彗星出輿鬼內自西北貫上台掃紫微文昌及北斗旦見東北凡四十餘日以阿合馬言益解州鹽課均賦諸色僧道雷平一等戶其太原小鹽聽從民便癸未改新鳳州為德寧以西番十八族部立安西州行安撫司事丁亥諸王筭吉所部營帳軍民被火發粟賑之庚寅給諸王也速不花印壬辰特詔諭鞏昌路總帥汪惟正勞勉之賜元寶文鈔三萬貫仍戊青居賜諸王玉龍峇失印仍以先朝獵戶賜之丁酉龍門禹廟成命侍臣阿合脫因代祀己亥定用御寶制凡宣命一品二品用玉

三品至五品用金其文曰皇帝行寶者即位時所鑄
惟用之詔誥別鑄宣命金寶行之庚子阿里不哥自
昔木土之敗不復能軍至是與諸王玉龍峇失阿速
帶昔里給其所謀臣不魯花忽察禿滿阿里察脫忽
思等來歸詔諸王皆太祖之裔並釋不問其謀臣不
魯花等皆伏誅八月壬寅朔陝西行省臣上言川蜀
戍兵軍需請令奧魯宮徵入官庫移文於近戍官司
依數取之宋新附民宜撥地土衣糧給其牛種仍禁
邊將分匿人口商州險要乞增戍兵陝西獵戶移獵
商州河西鳳翔屯田軍遷戍興元四川各翼軍有也

者徵其稅給無田者糧皆從之甲辰詔秦蜀行省發
銀二十五萬兩給沿邊歲用乙巳立諸路行中書省
以中書左丞相耶律鑄叅知政事張惠等行省事詔
新立條格省併州縣定官吏負數分品從官職給俸
祿頒公田計月日以考殿最均賦役招流移禁勿擅
用官物勿以官物進獻勿借易官錢勿擅科差役凡
軍馬不得停泊村坊詞訟不得隔越陳訴恤鰥寡勸
農桑驗兩澤平物價具盜賊囚徒起數月中省部又
頒陝西四川西夏中興北京三處行中書條格定立
諸王使臣驛傳稅賦差發不許擅招民戶不得以銀

與非投下人爲幹脫禁口傳敕旨及追呼省臣官屬
詔蒙古戶種田有馬牛羊之家其糧住支無田者仍
給之庚戌命燕王署勅諸王設僚屬及說書官諸站
戶限田四頃免稅供驛馬及祇應命各路總管府兼
領其事癸丑命僧子聰同議樞密院事詔子聰復其
姓劉氏易名秉忠拜太保叅領中書省事乙卯詔改
燕京爲中都其大興府仍舊增都省叅佐掾史月俸
丙辰劉秉忠王鶚張文謙商挺言燕王旣署相銜宜
於省中別置幕位每月一再至判署朝政其說書官
皇子忙安以李磐爲之南木合以高道爲之丁巳以

改元大赦天下詔曰應天者惟以至誠拯民者莫如
實惠朕以菲德獲承慶基內難未戡外兵未戢夫豈
一日于今五年賴天地之畀矜暨祖宗之垂裕凡我
同氣會於上都雖此日之小康敢朕心之少肆比者
星芒示儆雨澤愆常皆闕政之所繇顧斯民之何罪
宣布惟新之令溥施在宥之仁據不魯花忽察禿滿
阿里察脫火思輩構禍我家照依太祖皇帝扎撒正
典刑訖可大赦天下改中統五年爲至元元年於戲
否徃泰來迓續亨嘉之會鼎新革故正資輔弼之良
咨爾臣民體予至意戊午給益都武衛軍千人冬衣

已未鳳翔府龍泉寺僧超過等謀亂遇赦沒其財羈
管京兆僧司同謀蘇德責令從軍自効發萬戶石抹
紉札刺所部千人赴商州屯田亳州軍六百八人及
河南府軍六十人助欽察戍青居敕山東經畧副使
武秀選益都新軍千人克武衛軍赴中都城郊以沂
州監戰塔思萬戶孟義所部兵戍之太原路總管攸
忙兀帶坐歲甲匿戶罷職為民九月壬申朔立翰林
國史院以改元詔諭高麗國并赦其境內辛巳車駕
至自上都庚寅益都毛璋謀逆二子及其黨崔成並
伏誅籍其家貲賜行省撒吉思冬十月壬寅朔高麗

國王王禎來朝乙巳禁上都畿內捕獵庚戌有事
太廟壬子恩州歷亭縣進嘉禾一莖五穗戊辰改武
衛軍為侍衛親軍十一月丙子詔宋人歸順及北人
陷沒來歸者皆月給糧食辛巳征骨嵬先是吉里迷
內附言其國東有骨嵬亦里干兩部歲來侵疆故往
征之乙丑以至元二年曆日賜高麗國王王禎禁登
州和州等處并女真人入高麗界剽掠辛卯召衛州
太一五代度師李居素赴闕壬辰罷領中書左右部
併入中書省以領中書省左右部兼諸路都轉運使
知太府監事阿合馬為平章政事領中書省左右部

兼諸路都轉運使阿里爲中書右丞丁酉太原路臨
州進嘉禾二莖以元帥按敦劉整劉元禮欽察等將
士獲功賞賚有差十二月乙巳罷各投下達魯花赤
定中外百官儀從丁未敕遣宋謀者四人還其國戊
午賞拔都軍人銀五十萬兩甲子太陰犯房乙丑以王
鑑昔使大理沒於王事其子天赦不能自存優恤之
丁卯敕鄧州沿邊增立茱萸常平建陵季陽四堡戊
辰命選善水者一人沿黃河計水程達東勝可通漕
運馳驛以聞庚午詔罷樞密院斷事官及各路奧魯
官令總管府無總押所始罷諸侯世守立遷轉法是
歲真定順天洛磁順德大名東平曹濮州泰安高唐
濟州博州德州濟南濱棣淄萊河間大水賜諸王金
銀幣帛如歲例戶一百五十八萬八千一百九十五
戶死罪七十三人

本紀卷第五

本紀卷第六

元史六

翰林學士帶奏知制誥兼修國史臣宋濂翰林待制承直郎同知制誥兼國史院編修官臣王禕等奉勅撰

世祖三

二年春正月辛未朔日有食之癸酉山東廉訪使言真定路總管張宏前在濟南乘變盜用官物詔以宏嘗告李壇反免宏死罪罷其職徵贖物償官邳州萬戶張邦直等違制販馬並處死敕徙鎮海百里八謙謙州諸色匠戶於中都給銀萬五千兩為行費又徙奴懷忒木帶兒礮手人匠八百名赴中都造船運糧

元史本紀卷五

己卯北京路行省給札刺赤戶東徙行糧萬石以鄧州監戰訥懷新舊軍萬戶董文炳並為河南副統軍甲申詔申嚴越界販馬之禁違者處死乙酉以河南北荒田分給蒙古軍耕種戊子諸王塔察兒使臣闊闊出至北京花道驛手殺驛吏郝用郭和尚有旨徵鈔十定給其主贖死庚寅城西番匣谷路癸巳八東乞兒部牙西來朝貢銀鼠皮二千賜金素幣各九帛十有八武城縣王氏妻崔一產三男丁酉給親王玉龍峇失部民糧二千石高麗國王王植遣其弟公珣奉表來貢二月辛丑朔元帥按東與宋兵戰于釣魚

山敗之獲戰艦百四十六艘甲辰初立宮闈屬戊申賜親王兀魯帶河間王印給所部米千石丁巳車駕幸上都癸亥并六部為四以麥朮丁為吏禮部尚書馬亨戶部尚書嚴忠範兵刑部尚書別魯丁工部尚書禁山東東路私煎硝鹵甲子以蒙古人充各路達魯花赤漢人充總管回回人充同知永為定制以同知東平路宣慰使寶合丁為平章政事山東廉訪使王晉為叅知政事廉希憲商挺罷詔併諸王只必帖木兒所設管民官屬詔諭總統所僧人通五大部經者為中選以有德業者為州郡僧錄判正副都綱等

官仍於各路設三學講三禪會三月癸酉骨崑國人
襲殺吉里迷部兵敕以官粟及弓甲給之丁亥敕邊
軍習水戰屯田誅宋諜李富任乙未罷南北互市括
民間南貨官給其直遼東饑發粟萬石鈔百定賑之
夏四月戊午賜諸王合必赤亦怯烈金素幣各四拜
行金幣一五月壬午賞萬戶晃里答兒所部征吐蕃
功銀四百五十兩戊子禁北京平灤等處人捕獵庚
寅令軍中犯法不得擅自誅戮罪輕斷遣重者聞奏
敕上都商稅酒醋諸課毋徵其權鹽仍舊諸人自願
徙居永業者復其家詔西川山東南京等路戍邊軍

屯田閏五月癸卯升禧縣爲景州辛亥檢覈諸王兀
魯帶部民貧無孳畜者三萬七百二十四人人月給
米二斗五升四閱月而止丙辰雅州碉門宣撫使請
復碉門城邑詔相度之癸亥移秦蜀行省於興元丙
寅命四川行院分兵屯田丁卯分四親王南京屬州
鄭州隸合丹鈞州隸明里睢州隸李羅赤蔡州隸海
都他屬縣復還朝廷以平章政事趙璧行省于南京
河南府大名順德洛磁彰德懷孟等路平章政事廉
希憲行省事于東平濟南益都淄萊等路中書左丞
姚樞行省事于西京平陽太原等路詔諸路州府若

自古名郡戶數繁庶且當衝要者不須改併其戶不滿千者可併則併之各投下者併入所隸州城其散府州郡戶少者不須更設錄事司及司候司附郭縣止令州府官兼領括諸路未占籍戶任差職者以聞六月戊申朔新得州安撫向良言頃以全城內附元領軍民流散南界者多欲歸順並乞招徠從之又敕良以所領新降軍民移戍通江縣行新得州事辛未賜阿朮所部馬價鈔一千二十三錠有奇丙子太陰犯心大星戊寅移山東統軍司於沂州萬戶重喜立十字路復正陽命禿剌戍之己卯以淇州隸懷孟路高麗國王王禎遣其臣榮胤伯奉表來賀聖誕節千戶闊闕出部民乏食賜鈔賑之王晉罷樞密院臣言各路出征逃亡漢軍及貧難未起戶并投下隱匿事故者宜一槩發遣應役從之敕行院及諸軍將校卒伍須正身應役違者罪之秋七月辛酉益都大蝗饑命減價糶官粟以賑癸亥安南國王陳光昞遣使奉表來貢甲子詔賜光昞至元三年曆八月丙子濟南路鄒平縣進芝草一本戊寅高麗國王王禎遣使來貢方物己卯諸宰職皆罷以安童爲中書右丞相伯顏爲中書左丞相戊子召許衡於懷孟揚誠於益都車

駕至自上都九月戊戌以將有事太廟取大樂工於東平預習儀禮敕江淮汭邊樹柵徐宿邳三州助役徒庚子皇孫鐵穆爾生丁巳賞諸王只必帖木兒麾下河西戰功銀二百五十兩冬十月己卯享于太廟癸未敕順天張柔東平嚴忠濟河間馬總管濟南張林太原石抹總管等戶改隸民籍統軍抄不花萬戶懷都麾下軍士所俘宋人九十三口官贖爲民其私越禁界掠獲者四十五人許令親屬完聚並種田內地戊子詔隨路私商曾入南界者首實免罪充軍十一月丙申召李昶於東平辛丑賜諸王只必帖木兒

銀二萬五千兩鈔千錠癸丑賞楊文安戰功金五十兩所部軍銀六百兩及幣帛有差甲子詔事故貧難軍不堪應役者以兩戶或三戶合併正軍一名其丁單力備者許顧人應役十二月己巳省併州縣凡二百二十餘所庚午宋子貞言朝省之政不宜數行數改又刑部所掌事干人命尚書嚴忠範年少宜選老於刑名者爲之又請罷北京行中書省別立宣慰司以控制東北州郡並從之禁朝省告訐以息爭訟辛未以諸王也速不花所部戍西蕃軍屢有戰功賞銀三百兩癸酉召張德輝於真定徒軍公履於衛州丁

丑詔諭高麗賜至元三年曆日癸未賜劉秉忠金五十兩甲申賜伯顏宋子貞楊誠銀千兩鈔六十錠丁亥敕選諸翼軍富強才勇者萬人充侍衛親軍己丑瀆山大玉海成敕置廣寒殿是歲戶一百五十九萬七千六百一絲九十八萬六千二百八十八斤包銀鈔五萬七千六百八十二錠賜諸王金銀幣帛如歲例彰德大名南京河南府濟南淄萊太原弘州電西京北京益都真定東平順德河間徐宿邳蝗旱太原霜災斷死罪四十二人

三年春正月乙未高麗國王王植遣使來賀丙午遣

朶端趙壁持詔撫諭四川將吏軍民壬子立制國用使司以阿合馬爲使癸丑選女直軍二千爲侍衛軍四川行樞密院謀取嘉定請益兵命朶端趙壁摘諸翼蒙古漢軍六千人付之二月丙寅廉希憲宋子貞爲平章政事張文謙復爲中書左丞史天澤爲樞密副使癸酉立瀋州以處高麗降民壬午平陽路僧官以妖言惑衆伏誅以中書右丞張易同知制國用使司事叅知政事張惠爲制國用副使癸未車駕幸上都甲申罷西夏行省立宣慰司初製太常禮樂工冠服立東京廣寧懿州開元恤品合懶婆娑等路宣撫

司乙酉蠲中都今年包銀四分之一詔理斷阿朮部下所俘人口畜牧及其草地爲民侵種者以制國用使司條畫諭中外官吏三月辛巳分衛輝路爲親王玉龍峇失分地戊戌賑水達達民戶饑己未王晉及侍中和哲斯濟南益都轉運使王明以隱匿鹽課皆伏誅夏四月丁卯五山珍御榻成置瓊華島廣寒殿亳州水軍千戶胡進等領騎兵渡淝水逾荆山與宋兵戰殺獲甚衆賞鈔幣有差庚午敕僧道祈福於中都寺觀詔以僧機爲總統居慶壽寺己卯申嚴瀕海私鹽之禁敕宮燭毋彩繪五月乙未遣使諸路慮囚

庚子敕太醫院領諸路醫官惠民藥局辛丑以黃金飾渾天儀丙午浚西夏中興漢延唐來等渠凡良田爲僧所據者聽蒙古人分墾丙辰罷益都行省蠲平灤益都質子戶賦稅之半六月丁卯封皇子南木合爲北平王以印給之辛未徙歸化民於清州興濟縣屯田官給牛具壬申賜劉整畿內地五十頃癸酉以千戶札剌兒沒于王事賜其妻銀二百五十兩丙子立漕運司戊寅以陝西行省平童賽典赤等政事修治賜銀五千兩命山東統軍副使王仲仁督造戰船于汴申嚴陝西河南竹禁立拱衛司秋七月丙申罷

息州安撫司壬寅詔上都路總管府遇車駕巡幸行
留守司事車駕還即復舊丙午遣使祠五嶽四瀆甲
寅添內外巡兵外路每百戶選中產者一人充之其
賦令餘戶代輸在都增武衛軍四百己未以噶代堅
臺四州隸忻州詔令西夏避亂之民還本籍成都新
民爲豪家所庇者皆歸之州縣詔招集逃亡軍限百
日詣所屬陳首原其罪貧者併戶應役八月癸亥賜
丞相伯顏第一區丁卯以兵部侍郎黑的禮部侍郎
殷弘使日本賜書曰皇帝奉書日本國王朕惟自古
小國之君境土相接尚務講信修睦况我祖宗受天

明命奄有區夏遐方異域畏威懷德者不可悉數朕
即位之初以高麗無辜之民久瘁鋒鏑即令罷兵還
其疆場反其旄倪高麗君臣感戴來朝義雖君臣而
歡若父子計王之君臣亦已知之高麗朕之東藩也
日本密邇高麗開國以來時通中國至於朕躬而無
一乘之使以通和好尚恐王國知之未審故特遣使
持書布告朕心冀自今以往通問結好以相親睦且
聖人以四海爲家不相通好豈一家之理哉以至用
兵夫孰所好王其圖之又詔高麗導去使至其國戊
子高麗國王王植遣其大將軍朴琪來賀聖誕節阿

木畧地斬黃俘獲以萬計九月戊午車駕至自上都
冬十月庚申朔降德興府爲奉聖州癸亥高麗使還
以王植病詔和藥賜之丁丑徙平陽經籍所于京師
更敕牒舊式太廟成丞相安童伯顏言祖宗世數尊
謚廟號增祀四世各廟神主配享功臣法服祭器等
事皆宜定議命平章政事趙壁等集群臣議定爲八
室申禁京畿畋獵壬午命制國用使司造神臂弓千
張矢六萬十一月辛卯初給京府州縣司官吏俸及
職田戊戌瀕御河立漕倉丁未申嚴殺牛馬之禁宋
子貞致仕辛亥以忽都答兒爲中書左丞相詔禁天

文圖讖等書丙辰千五百散竹帶以嗜酒失所守大良
平罪當死錄其前功免死令往東川軍前自效詔建
都使復歸朝又詔嘉定等府沿江一帶城堡早降又
詔四川行樞密院遣人告諭江漢庸蜀等效順具官
吏姓名對階換授有功者遷有才者用民無生理者
以衣糧賑之願遷內地者給以田廬毋令失所十二
月庚申給諸王合必赤行軍印辛酉詔改四川行樞
密院爲行中書省以賽典赤也速帶兒等僉行中書
省事甲子立諸路洞冶所以梁成生擒宋總轄官授
同知開州事佩金符減輝州竹課先是官取十之六

至是減其二丁亥詔安肅公張柔行工部尚書段天祐等同行工部事修築宮城併太府監入宣徽院仍以宣徽使專領監事詔賜高麗以至元四年曆日仍慰諭之建大安閣于上都鑿金口導盧溝水以漕西山木石敕諸越界私商及諜人與僞造鈔者送京師審覈是歲天下戶一百六十萬九千九百三東平濟南益都平灤真定洛磁順天中都河間北京蝗京兆鳳翔旱斷死罪九十六人賜諸王金銀幣帛如歲例四年春正月甲午陝西行省以開州新得復失請益兵敕平陽延安等處簽民兵三千人山東河南懷孟潼川調兵七千人益之丁酉申嚴平陽等處私鹽之禁壬寅立茶速禿水十四驛癸卯勅修曲阜宣聖廟乙巳百濟遣其臣梁浩來朝賜以錦繡有差禁僧官侵理民訟辛亥封安肅公張柔爲蔡國公以趙壁爲樞密副使立諸路洞冶都總管府癸丑敕封昔木土山爲武定山其神曰武定公泉爲靈淵其神曰靈淵侯食蒙古軍戶二丁三丁者出一人爲軍四丁五丁者二人六丁七丁者三人乙卯高麗國王王禎遣使來朝詔撫慰之戊午立提點宮城所析上都隆興府自爲一路行總口府事立開元等路轉運司城大都

二月庚申粘合南合復平章事阿里復爲中書右丞
丁卯改經籍所爲弘文院以馬天昭知院事丁亥括
西夏民田徵其租車駕幸上都詔陝西行省招諭宋
人又詔嘉定瀘州重慶夔府涪達忠萬及釣魚禮義
大良等處官吏軍民有能率衆來降者優加賞擢三
月己丑復以耶律鑄爲中書左丞相辛卯自潼關至
蘄縣立河渡官八員以察姦僞乙未救中都路建習
樂堂使樂工隸業其中己亥賜皇子燕王忙阿剌那
沒罕忽哥赤銀三萬兩辛丑夏津縣大雨雹壬寅安
童言比者省官員數平章左丞各一員今丞相五人

素無此例臣等議擬設二丞相臣等蒙古人三員惟
陛下所命詔以安童爲長史天澤次之其餘蒙古漢
人叅用勿令員數過多又詔宜用老成人如姚樞等
一二員同議省事丁巳耶律鑄制官縣樂成詔賜名
大成夏四月甲子新築宮城辛未遣使祀岳瀆五月
丁亥朔日有食之敕上都重建孔子廟乙未應州大
水丙申威州山後大番弄麻等十一族來附賜以璽
書金銀符已酉以捕獵戶達魯花赤爲造銀符處死
壬子敕諸路官吏俸令包銀民戶每四兩增納一兩
以給之丙辰析東平之博州五城別爲一路六月壬

成以中都順天東平等處蠶災免民戶絲料輕重有差乙丑復以史天澤爲中書左丞相忽都荅兒耶律鑄並降平章政事伯顏降中書右丞廉希憲降中書左丞阿里張文謙並降叅知政事乙酉賜諸王玉龍荅失銀五千兩幣三百歲以爲常罷宣徽院黑的殷弘以高麗使者宋君斐金贊不能導達至日本來奏降詔責高麗王王植仍令其遣官至彼宣布以必得要領爲期秋七月丙戌朔敕自中興路至西京之東勝立水驛十戌戌罷息州安撫岳林以其民隸南京路罷懷孟路安撫李宗傑以其民隸本路發鞏昌鳳

翔京兆等處未占籍戶一千修治四川山路橋梁棧道大名路達魯花赤愛魯總管張弘範等盜用官錢罷之壬寅申嚴京畿牧地之禁甲寅詔亦即納新附貧民從人借貸困不能償者官爲償之仍給牛具種實及糧食發東京軍千八百人充侍衛軍八月庚申填星犯天罇辛酉申嚴平灤路私鹽酒醋之禁丙寅復立宣徽院以前中書右丞相線真爲使丁丑封皇子忽哥赤爲雲南王賜駝鈕金鍍銀印壬午太白犯軒轅大星命怯綿征建都高麗國王王植遣其秘書監郭汝弼來賀聖誕節阿木畧地至襄陽俘生口五

萬馬牛五千宋人遣步騎來拒阿朮率騎兵敗之九月壬辰作玉殿于廣寒殿中乙未總帥汪良臣請立寨於毋章德山控扼江南以當釣魚之衝從之戊申以許衡爲國子祭酒安南國王陳光昺遣使來貢優詔答之立大理等處行六部以闊闊帶爲尚書兼雲南王傳牋禎尚書兼府尉甯源侍郎兼司馬庚戌遣雲南王忽哥赤鎮大理鄯闡茶罕董赤禿哥兒金齒等處詔撫諭吏民又詔諭安南國俾其君長來朝子弟入質編民出軍役納賦稅置達魯花赤統治之癸丑申嚴西夏中興等路僧尼道士商稅酒醋之禁車

駕至自上都王鶚請立選舉法有旨今議舉行有司難之事遂寢冬十月辛酉制國用司言別怯赤山石絨織爲布火不能然詔采之壬戌賜駙馬不花銀印魚通崑州等處達魯花赤李福招諭西番諸族酋長以其民入附以阿奴版的哥等爲噶吾等處總管並授璽書及金銀符鐵旗城後番官官折蘭遣其子天郎持先受憲宗璽書金符乞改授新命從之甲子歲星犯軒轅大星辛未太原進嘉禾二本異畝同穎甲戌賑新附民陳忠等鈔丁丑制國用使司請量節經用從之庚辰定品官子孫廕叙格十一月乙酉享于

太廟戊戌立新蔡縣以忽察李家奴統所部兵戌之
甲辰立夔府路總帥府戌開州乙巳填星犯天罇距
星申嚴京畿畋獵之禁南京宣慰劉整赴闕奏攻宋
方畧宜先從事襄陽十二月甲戌賞河南南路統軍使
訥懷所部將士戰功銀九千六百五十兩鈔幣鞍勒
有差丙子賑親王移相哥所部饑民丁丑給遼東新
簽軍布六萬匹己卯立遼東路水驛七賞元帥阿朮
部下有功將士二千二十五人銀五萬五千三百兩
金五十兩及錦綵鞍勒有差庚辰簽女直水達達軍
三千人立諸位幹脫總管府省平陽路岳陽和州二
縣入冀氏復置霸州益津縣省安西路櫟陽縣入臨
潼是歲天下戶口一百六十四萬四千三十山東河
南北諸路蝗順天東鹿縣旱免其租斲死罪一百十
四人賜諸王金銀幣帛如歲例

五年春正月甲午陰犯井庚子上都建城隍廟辛丑
敕陝西五路四川行省造戰艦五百艘付劉整高麗
國王王祖遣其弟温來朝詔以祖飾辭見欺面數其
事於温切責之復遣北京路總管于也孫脫禮部郎
中孟甲持詔往諭令具表遣海陽公金俊侍郎李箴
用與去使同來以聞庚戌賜高麗國新曆閏月戊午

以陳亮穎蔡等處屯田戶充軍令益都漏籍戶四千
淘金登州栖霞縣每戶輸金歲四錢二月戊子太陰犯
天關己丑太陰犯井給河南山東貧乏軍士鈔戊戌改
軍器局爲軍器監辛丑百戶渾都速駐營濟南路屬
縣三年脅取民飲食糧料當粟五千石救杖決之仍
償粟千石析甘州路之肅州自爲一路三月丙寅罷
諸路四品以下子孫入質者田禹妖言救減死流之
遠方禁民間兵器犯者驗多寡定罪甲子救怯綿率
兵二千招諭建都壬申改母章德山爲定遠城武群
山爲武勝軍丁丑救阿里等詣軍前閱視軍籍罷諸

路女直契丹漢人爲達魯花赤者回回畏兀乃蠻唐
兀人仍舊夏四月壬寅遣使祀嶽瀆五月辛亥朔以
太醫院拱衛司教坊司及尚食尚果尚醞三局隸宣
徽院癸亥都元帥百家奴拔宋嘉定五花石城白馬
三紫癸酉賜諸王禾忽及八刺合幣帛六萬匹六月
辛巳朔濟南王保和以妖言惑衆謀作亂救誅首惡
五人餘勿論甲申中山大雨雹阿朮言所領者蒙古
軍若遇山水砦柵非漢軍不可宜令史樞率漢軍協
力征進從之戊申東平等處蝗己酉封諸王習怯吉
爲河平王賜駝鈕金印秋七月辛亥召翰林直學士

高鳴順州知州劉瑜中都郝謙李天輔韓彥文李祐
赴上都以山東統軍副使王仲仁戍眉州壬子詔陝
西統軍司兼領軍民錢穀罷各路奧魯官令管民官
兼領癸丑立御史臺以右丞相塔察兒爲御史大夫
詔諭之曰臺官職在直言朕或有未當其極言無隱
毋憚他人朕當爾主仍以詔諭天下立高州北二驛
戊辰罷西夏宣撫司庚午省諸路打捕鷹坊工匠洞
冶總管府令轉運司兼領之丙子立西夏惠民局高
麗國王王植遣其臣崔東秀來言備兵一萬造船千
隻詔遣都統領脫朶兒往閱之就相視黑山日本道

路仍命鮑羅別造船百艘以伺調用詔四川行省賽
典赤自利州還京兆立東西二川統軍司以劉整爲
都元帥與都元帥阿朮同議軍事整至軍中議築白
河口鹿門山遣使以聞許之罷軍中諸司叅議八月
乙酉程思彬以投匿名書言斥乘輿伏誅己丑亳州
大水庚子敕京師瀕河立十倉命忙古帶率兵六千
征西番建都九月癸丑中都路水免今年田租罷中
都路和顧所丁巳阿朮統兵圍樊城敕長春宮修設
金籙周天大醮七晝夜建堯廟及后土太寧宮庚申
賜安南國王陳光昞錦綉及其諸臣有差己丑立河

南屯田命兵部侍郎黑的禮部侍郎殷弘齋國書復使日本仍詔高麗國遣人導送期於必達毋致如前稽阻詔諭安南國陳光昞來奏稱占城真臘二寇侵擾已命卿調兵與不干併力征討今復命雲南王忽哥赤統兵南下卿可遵前詔遇有叛亂不庭爲邊寇者發兵一同進討降服者善爲撫綏車駕至自上都益都路饑以米三十一萬八千石賑之復以史天澤爲樞密副使冬十月戊寅朔日有食之己卯敕中書省樞密院凡有事與御史臺官同奏立河南等路行中書省以叅知政事阿里行中書省事庚辰以御史

中丞阿里爲叅知政事壬午詔恤沿邊諸軍其橫種

差賦責奧魯官償之庚寅敕從臣禿忽思等錄毛詩

孟子論語乙未享于太廟中書省臣言前代朝廷必

有起居注故善政嘉謨不致遺失即以和禮霍孫獨

胡刺充翰林待制兼起居注敕給黎雅嘉定新附民

田戊戌宮城成劉秉忠辭領中書省事許之爲大保

如故十一月己酉簽河南山東邊城附籍諸色戶充

軍庚申宋兵自襄陽來攻汧山諸寨阿朮分諸軍禦

之斬獲甚衆立功將士千三百四人詔首立戰功生

擒敵軍者各賞銀五十兩其餘賞賚有差癸酉御史

臺臣言立臺數月發擿甚多追理侵欺糧粟近二十萬石錢物稱是有詔褒諭免南京河南兩路來歲修築都城役夫十二月戊寅以中都濟南益都淄萊河間東平南京順天順德真定恩州高唐濟州北京等處大水免今年田租敕二分二至及聖誕節日祭星于司天臺詔諭四川行省沿邊屯戍軍士逃役者處死復置乾州奉天縣省好時永壽入焉以鳳州隸興元路德興府改奉聖州隸宣德是歲京兆大旱天下戶一百六十五萬二百八十六斷死罪六十九人賜諸王金銀幣帛如歲例

六年春正月癸丑高麗國王王植遣使以誅權臣金佖來告賜曆日西錦立四道按察司戊午阿木軍入宋境至復州德安府荆山等處俘萬人而還庚申以叅知政事楊果爲懷孟路總管甲戌益都淄萊大水恩州饑命賑之敕史天澤與樞密副使駙馬忽剌出董師襄陽二月壬午以立四道提刑按察司詔諭諸道己丑詔以新製蒙古字頒行天下丙申罷宣德府稅課所以上都轉運司兼領改河南懷孟順德三路稅課所爲轉運司丁酉簽民兵二萬赴襄陽賑欠州人匠貧乏者米五千九百九十九石敕鞍靴箭鏃等

物自今不得以黃金爲飾開元等路饑減戶賦布二
疋秋稅減其半水達達戶減青鼠二其租稅被災者
免徵免算丁貧乏軍士一千九百餘戶爲民癸卯給
河南行省鈔千錠犒軍三月甲寅詔益都路簽軍萬
人人給鈔二十五貫戊午賑曹州饑築堡鹿門山夏
四月辛巳製玉璽大小十紐甲午遣使祀岳瀆大名
等路饑賑米十萬石五月丙午東平路饑賑米四萬
一千三百餘石辛酉詔禁戍邊軍士牧踐屯田禾稼
六月辛巳以招討怯綿征建都敗績又擅追唆火兒
璽書金符處死壬午免益都新簽軍單丁若干六百

二十一人爲民丁亥河南河北山東諸郡蝗癸巳敕
真定等路旱蝗其代輸築城役夫戶賦悉免之丙申
高麗國王王植遣其世子湛來朝賜植玉帶一湛金
五十兩從官銀幣有差壬寅阿朮率兵萬五千人院
宋萬山射堞岡鬼門關樵蘇之路癸卯詔董文炳等
率兵二萬二千人南征東昌路饑賑米二萬七千五
百九十石秋七月丁巳遣宋私商四十五人還其國
庚申水軍千戶邢德立張志等生擒宋荆鄂都統唐
永堅賞銀幣有差辛酉製太常寺祭服壬戌西京大
雨雹巳巳立諸路蒙古字學癸酉立國子學詔遣官

審理諸路寃滯正犯死罪明白者各正典刑其雜犯
死罪以下量斷遣之又詔諭宋國官吏軍民示以不
欲用兵之意復遣都統領脫朶兒統領王昌國等往
高麗點閱所備兵船及相視耽羅等處道路立西蜀
四川監榷茶場使司宋將夏貴率兵船三千至鹿門
山萬戶解汝楫李庭率舟師敗之俘殺二千餘人獲
戰艦五十艘八月己卯立金州招討司丙申以沙肅
州鈔法未行降詔諭之詔諸路勸課農桑命中書省
采農桑事列爲條目仍令提刑按察司與州縣官相
風土之所宜講究可否別頒行之高麗國世子愷奏

其國臣僚擅廢國王王植立其弟安慶公湄詔遣幹
朶思不花李諤等往其國詳問條具以聞九月癸丑
恩州進嘉禾一莖三穗戊午敕民間貸錢取息雖踰
限止償一本息己未授高麗世子王愷特進上柱國
東安公壬戌豐州雲內東勝早免其租賦戊辰敕高
麗世子愷率兵三千赴其國難愷辭東安公乃授特
進上柱國辛未敕管軍萬戶宋仲義征高麗以忽刺
出史天澤並平章政事阿里中書右丞行河南等路
中書省事賽典赤行陝西五路西蜀四川中書省事
車駕至自上都幹朶思不花李諤以高麗刑部尚書

金方慶至奉權國王王浚表訴國王王植遘疾令弟浚權
國事冬十月己卯定朝儀服色壬午陞高唐冠氏並
爲州丁亥廣平路旱免租賦詔遣兵部侍郎黑的淄
萊路總管府判官徐世雄召高麗國王王植王弟浚
及權臣林衍俱赴闕命國王頭輦哥以兵壓其境趙
璧行中書省于東京仍降詔諭高麗國軍民庚子太陰
犯辰星宋遣人餽鹽糧入襄陽我軍獲之賜諸王奧
魯赤駝鈕金鍍銀印十一月癸卯高麗都統領崔坦
等以林衍作亂挈西京五十餘城來附丁未簽王綽
洪茶丘軍三千人往定高麗高麗西京都統李延齡

乞益兵遣忙哥都率兵二千赴之庚午敕諸路鰥寡
廢疾之人月給米二斗安南國王陳光晒遣使來貢
濟南饑以米十二萬八千九百石賑之高麗國王王
植遣其尚書禮部侍郎朴休從黑的入朝表稱受詔
已復位尋當入覲築新城于漢江西十二月戊子築
東安渾河堤己丑作佛事于太廟七晝夜高唐固安
二州饑以米二萬六百石賑之析彰德懷孟衛輝爲
三路陞林慮縣爲林州改楨州復爲韓城縣併省馮
翊等州縣十所以懿州廣寧等府隸東京是歲天下
戶一百六十八萬四千一百五十七賜諸王金銀幣

帛如歲例斷死罪四十二人

本紀卷第六

本紀卷第七

元史七

翰林學士畢夫知制誥兼修國史宋濂翰林行制承直郎知制誥兼國史院編管臣王禕等奉

勅修

世祖四

七年春正月辛丑朔高麗國王王禎遣使來賀丙午
耶律鑄廉希憲罷立尚書省罷制國用使司以平章
政事忽都答兒為中書左丞相國子祭酒許衡為中
書左丞制國用使阿合馬平章尚書省事同知制國
用使司事張易同平章尚書省事制國用使司副使
張惠簽制國用使司事李堯咨麥朮丁並參知尚書

省事已酉太陰犯畢敕諸投下官隸中書省壬子敕
驛券無印者不許乘傳甲寅高麗國王王植遣使來
言比奉詔臣已復位今從七百人入覲詔令從四百
人來餘留之西京詔高麗西京內屬改東寧府畫慈
悲嶺爲界丁巳以蒙哥爲安撫高麗使佩虎符率兵
戍其西境戊午均房州總管孫嗣擒宋統制朱興祖
等丙寅賑兀魯吾民戶鈔丁卯定省院臺文移體式
二月辛未朔以前中書右丞相伯顏爲樞密副使甲
戌築昭應宮于高梁河丙子帝御行宮觀劉秉忠李
羅許衡及太常卿徐世隆所起朝儀大悅舉酒賜之

丁丑以歲饑罷修築宮城役夫甲申置尚書省署乙
酉立紙甲局申嚴畜牧損壞禾稼桑果之禁壬辰立
司農司以參知政事張文謙爲卿設四道巡行勸農
司乙未宋襄陽出步騎萬餘人兵船百餘艘來趨萬
山堡萬戶張弘範千戶脫脫擊却敗之事聞各賜金
紋綾有差高麗國王王植來朝求見皇子燕王詔曰
汝一國主也見朕足矣植請以子懼見從之詔諭植
曰汝內附在後故班諸王下我太祖時亦都護先附
即令齒諸王上阿思蘭後附故班其下卿宜知之又
詔令國王頭輦哥等舉軍入高麗舊京以脫脫朶兒

焦天翼爲其國達魯花赤護送植還國仍下詔林衍廢立罪不可赦安慶公渴本非得已在所寬宥有能執送衍者雖舊在其黨亦必重增官秩世子懋奏乞隨朝及尚主不許命隨其父還國三月庚子朔日有食之改河南等路及陝西五路西蜀四川東京等路行中書省爲行尚書省尚書省臣言河西和糴應僧人豪官富民一例行之制可甲寅車駕幸上都丙辰浚武縣御河丁巳定醫官品從戊午益都登萊蝗旱詔減其今年包銀之半阿朮與劉整言圍守襄陽必當以教水軍造戰艦爲先務詔許之教水軍七萬餘

人造戰艦五千艘夏四月壬午檀州隕黑霜一夕設

諸路蒙古字學教授敕諸路達魯花赤子弟法叙充

散府諸州達魯花赤其散府諸州子弟充諸縣達魯

花赤諸縣子弟充巡檢改御史臺典事爲都事癸未

定軍官等級萬戶總管千戶百戶總把以軍士爲差

已丑省終南縣入盩厔復真定贊皇縣太原樂平縣

高麗行省遣使來言權臣林衍死其子惟茂擅襲令

公位爲尚書宋宗禮所殺島中民皆出降已遷之舊

京衍黨裴仲孫等復集餘衆立植庶族承化侯爲王

竄入珍島五月辛丑懷州河內縣大雨雹癸卯陝西

簽省也速帶兒嚴忠範與東西川統軍司率兵及宋
兵戰于嘉定重慶釣魚山馬湖江皆敗之拔三寨擒
都統牛宣俘獲人民及馬牛戰艦無算甲辰威州汝
鳳川番族八千戶內附其酋長來朝授宣命賜金符
丁未東京路饑募運糧造船勞役免今年絲銀十之
三以同知樞密院事合荅爲平章政事乙卯復平灤
路撫寧縣以海山昌黎入之丙辰括天下戶尚書省
臣言諸路課程歲銀五萬錠恐疲民力宜減十分之
一運司官吏俸祿宜與民官同其院務官量給工食
仍禁所司多取於民歲終較其增損而加黜陟上都

地里遙遠商旅往來不易特免收稅以優之惟市易
莊宅奴婢孳畜例收契本工墨之費管民官遷轉以
三十月爲一考數於變易人心苟且自今請以六十
月遷轉諸王遣使取索諸物及鋪馬等事自今並以
文移毋得口傳教令並從之改宣徽院爲光祿司秩
正三品以宣徽使線真爲光祿使庚申命樞密院閣
實軍數壬戌東平府進瑞麥一莖二穗三穗五穗者
各一本省中都打捕鷹坊總管府入工部大名東平
等路桑蠶皆災南京河南等路蝗減今年銀絲十之
三六月丙子敕西夏中興市馬五百疋庚辰敕戍軍

元史卷之六十四
四
還有乏食及病者令所過州城村坊主者給飲食醫藥丁亥罷各路洞冶總管府以轉運司兼領徙謙州甲匠于松山給牛具賜皇子南木合馬六千牛三千羊一萬賜北邊戍軍馬二萬牛一千羊五萬丙申立藉田大都東南郊禁民擅入宋境剽掠秋七月辛丑設上林署乙卯賜諸王拜答寒印及海青金符二庚申初給軍官俸壬戌僉諸道回回軍乙丑閱實諸路撥手戶都元帥也速帶兒等畧地光州敗宋兵于金剛臺以遼東開元等路總管府兼本路轉運司事山東諸路旱蝗免軍戶田租戍邊者給糧命廷魯花赤

兀良吉帶給上都扈從畝獵糧八月戊辰朔築環城以逼襄陽己巳賑應昌府饑諸王拜答寒部曲告饑命有車馬者徙居黃忽兒王良之地計口給糧無車馬者就食肅沙甘州庚寅隆興府總管昔剌幹脫以盜用官錢罷庚辰以御史大夫塔察兒同知樞密院事御史中丞帖只為御史大夫高麗世子王楗來賀聖誕節辛巳設應昌府官吏辛卯保定路霖雨傷禾稼九月庚子敕僧道也里可溫有家室不持戒律者占藉為民丁巳太陰犯井丙寅括河西戶口定田稅宋將范文虎以兵舡二千艘來援襄陽阿木合答劉整

率兵逆戰于灌子灘殺掠千餘人獲船三十艘文虎引退西京饑敕諸王阿只吉所部就食大原山東饑敕益都濟南酒稅以十之二收糧冬十月戊辰朔敕兩省以已奏事報御史臺庚午太白犯右執法祭酉敕宗廟祭祀祝文書以國字乙亥宋人攻莒州乙酉享于太廟丁亥以南京河南兩路旱蝗減今年差賦十之六發清滄鹽二十四萬斤轉南京米十萬石並給襄陽軍己丑敕來年太廟牲牢勿用豢豕以野豕代之時果勿市取之內園車駕至自上都降興中府為州賑山東淄萊路饑十一月壬寅災賊犯太微西

垣上將壬子河西諸郡諸王頓舍僧民協力供給丁巳敕益兵二千合前所發軍為六千屯田高麗以忻都及前左壁總帥史樞並為高麗金州等處經畧使佩虎符領屯田事仍詔諭高麗國王立侍儀司安南國王陳光昞遣使來貢優詔荅之復賑淄萊路饑閏月丁卯朔高麗世子王懋還賜王禘至元八年曆戊辰禁繒段織日月龍虎及以龍犀飾馬鞍者己巳給河西行省鈔萬錠以充歲費以義州隸婆婆府癸未詔諭西夏提刑按察司管民官禁僧徒冒據民田壬辰申明勸課農桑賞罰之法詔設諸路脫脫禾孫十

二月丙申朔改司農司為大司農司添設巡行勸農使副各四員以御史中丞李羅兼大司農卿安童言李羅以臺臣兼領前無此例有旨司農非細事朕深諭此其令李羅總之命陝西等路宣撫使趙良弼為祕書監充國信使使日本敕歲祀太社太稷風師雨師雷師戊戌徙懷孟新民十八百餘戶居河西壬寅陞御史大夫秩正二品降河南韶州為澠池縣宋重慶制置朱禔孫遣謀者持書榜來誘安撫張大悅等夫悅不發封併謀者送致東川統軍司丁未金齒驃國三部酋長阿匿福勒丁阿匿爪來內附獻馴象三

馬十九匹已酉魚通路知府高曳失獲宋謀者詔賞之辛酉以都水監隸大司農司以諸王伯忽兒為札魯忽赤之長建大護國仁王寺于高良河敕更定僧服色是歲天下戶一百九十三萬九千四百四十九賜先朝后妃及諸王金銀幣帛如歲例斷死刑四十四人

八年春正月乙丑朔高麗國王王植遣其祕書監朴恒郎將崔有滄來賀兼奉歲貢丙寅太陰犯畢巳卯以同僉河南等路行中書省事阿里海牙參知尚書省事中書省臣言前有旨令臣與樞密院御史臺議

河南行省阿里伯等所置南陽等處屯田臣等以爲凡屯田人戶皆內地中產之民遠徙失業宜還之本籍其南京南陽歸德等民賦自今悉折輸米糧貯於便近地以給襄陽軍食前所屯田阿里伯自以無效引伏宜令州郡募民耕佃從之史天澤告老不允敕前築都城徙居民三百八十二戶計其直償之設樞密院斷事官遣兀都蠻率蒙古軍鎮西方當當丙戌高麗安撫阿海畧地珍島與逆黨遇多所亡失中書省臣言謀知珍島餘糧將竭宜乘弱攻之詔不許令巡視險要常爲之備丁亥管如仁費正寅以國機事

爲書謀遣崔繼春賈菲山路坤入宋事覺窮治正寅如仁繼春皆正典刑菲山坤並流遠方壬辰敕諸路鰥寡孤獨疾病不能自存者官給廬舍薪米高麗國王王植遣使奉表爲世子懋請昏詔禁邊將受賂放軍及科斂賑北京益都饑二月乙未朔定民間婚聘禮幣貴賤有差丁酉發中都真定順天河間平灤民二萬八千餘人築宮城巳亥罷諸路轉運司入總管府以尚書省奏定條畫頒天下移陝蜀行中書省于興元癸卯四川行省也速帶兒言比因饑饉盜賊滋多宜加顯戮詔令群臣議安童以爲強竊盜賊一皆

歿死恐非所宜罪至死者仍舊待命以中書左丞東
京等路行尚書省事趙璧爲中書右丞甲辰添設監
察御史六員命忽都答兒持詔招諭高麗林衍餘黨
裴仲孫乙巳大理等處宣慰都元帥實合丁王傳閣
闊帶等協謀毒殺雲南王火你赤曹瑱發其事實合
丁闊闊帶及阿老瓦丁亦速夫並伏誅賞瑱火你赤
及證左人金銀有差以沙州瓜州鷹坊三百人充軍
戊申詔以治事日程諭中外官吏敕徃畏吾兒地市
米萬石庚戌申嚴東川井鹽之禁己未敕軍官佩金
符其民官工匠所佩者並拘入勿復給敕海書符

用太祖皇帝御署庚申奉御九住舊以梳櫛奉太祖
奉所落鬚髮束上詔櫛之藏于太廟夾室辛酉敕凡
訟而自匿及誣告人罪者以其罪罪之分歸德爲散
府割宿亳邳徐等州隸之并申州爲南陽府割唐鄧
裕嵩汝等隸之賑西京饑三月乙丑增治河東山西
道按察司改河東陝西道爲陝西四川道山北東西
道爲山北遼東道甲戌敕元正聖節朝會凡百官表
章外國進獻使臣陛見朝辭禮儀皆隸侍儀司丙子
改山東河間陝西三路鹽課都轉運司爲都轉運鹽
使司己卯中書省臣言高麗叛臣裴仲孫乞諸軍退

屯然後內附而忻都未從其請今願得全羅道以居
直隸朝廷詔以其飾詞遷延歲月不允辛巳復立夏
邑縣以碭山入焉省穀熟入睢陽濱棣萬戶韓世安
坐私儲糧食燒毀軍器詐乘驛馬及擅請諸王塔察
兒益都四縣分地等事有司屢以爲言詔誅之仍籍
其家甲中車駕幸上都乙酉許衡以老疾辭中書機
務除集賢大學士國子祭酒衡納還舊俸認別以新
俸給之命設國子學增置司業博士助教各一員選
隨朝百官近侍蒙古漢人子孫及俊秀者克生徒丁
亥熒惑犯太微西垣上將已丑立西夏中興等路行

尚書省以赴海參知行尚書省事命尚書省閱寶天
下戶口頒條畫諭天下賑益都等路饑敕有司毋留
獄滯訟以致越訴違者官民皆罪之制封皇子燕王
乳母趙氏函國夫人夫鞏德祿追封德育公夏四月
壬寅高麗鳳州經畧司忻都言叛臣裴仲孫稽留使
命負固不服乞與忽林赤王國昌分道進討從之平
灤路昌黎縣民生子中夜有光詔加鞠養或以爲非
宜帝曰何幸生一好人母生嫉心也命高麗簽軍征
珍島癸卯給河南行中書省歲用銀五十萬兩仍敕
襄樊軍士自今人月給米四斗甲辰簽壯丁備宋戊

元史本紀卷之七
午阿朮率萬戶阿剌罕等與宋將范文虎等戰于湍灘敗之獲統制朱勝等百餘人奪其軍器賞阿朮阿剌罕等金帛有差以至元七年諸路災蠲今歲絲料輕重有差五月乙丑以東道兵圍守襄陽命賽典赤鄭鼎提兵水陸並進以趨嘉定汪良臣彭天祥出重慶札剌不花出瀘州曲立吉思出汝州以牽制之改簽省也速帶兒鄭鼎軍前行尚書事賽典赤行省事于興元轉給軍糧丙寅年魚國來貢己巳修佛事于瓊華島辛未分大理國三十七部爲三路以大理八部蠻酋新附降詔撫諭士申造內外儀仗丁丑賑蔚

州饑己卯命史天澤平章軍國重事陞太府監爲正三品忻都史樞表言玠島賊徒敗散餘黨竄入耽羅辛巳賜河西行省金符銀海青符各一令蒙古官子弟好學者兼習筭術癸未升濟州爲濟寧府以玉宸院隸宣徽院高麗國王王植遣使貢方物六月甲午敕樞密院凡軍事徑奏不必經由尚書省其干錢糧者議之上都中都河間濟南淄萊真定衛輝洛磁順德大名河南南京彰德益都順天懷孟平陽歸德諸州縣蝗癸卯宋將范文虎率蘇劉義夏松等舟師十萬援襄陽阿朮率諸將迎擊奪其戰船百餘艘敵敗

走平章合答又遣萬戶解汝楫等邀擊擒其總管朱日新鄭臯大破之辛亥敕凡管民官所領錢穀公事並俟年終考較乙卯招集河西幹端昂吉呵等處居民已未山東統軍司塔出董文炳偵知宋人欲據五河口請築城守之既而坐失事機宋兵已樹柵其地事聞敕決罰塔出文炳等有差遼州和順縣解州聞喜縣好坊生秋七月壬戌朔尚書省請增太原鹽課歲以鈔千錠爲額仍令本路兼領從之設回回司天臺官屬以札馬刺丁爲提點簽女直水達達軍以鄭元領祠祭岳瀆授司禮大夫丁卯南人李忠進言運

山侍郎張大悅嘗與宋交通以其事無實詔諭大悅宋善用間朕不輕信毋懷疑懼以國王頭輦哥行尚書省于北京遼東等路辛未置左右中三衛親軍都指揮使司乙亥鞏昌臨洮平涼府會蘭等州隕霜殺禾乙酉宋將來興國攻百文山營阿木擊破之追至湍灘斬首二千餘級高麗世子王懋入質珍島脅從民戶來降八月壬辰朔日有食之癸巳敕軍站戶地頃以上依例輸租己亥詔招諭宋襄陽守臣呂文煥壬子車駕至自上都遷成都統軍司於眉州己未聖誕節初立內外仗及雲和署樂位東川統兵司引

兵攻宋銅鈹寨守寨總管李慶等降以慶知梁山軍
事九月壬戌朔敕都元帥阿朮以所部兵畧地漢南
癸亥高麗世子王懋辭歸賜國王王植西錦優詔諭
之甲子賜劉整鈔五百錠鄧州田五百頃整辭改賜
民田三百戶科調如故給河南行省歲用鈔二萬八
千六百錠丙寅罷陝西五路西蜀四川行尚書省以
也速答兒行四川尚書省事于興元京兆等路直隸
尚書省敗宋軍于渦河戊辰陞成都府德陽縣爲德
州降虢州爲虢略縣壬申選胄子脫脫木兒等十人
肄業國學癸酉益都府濟州進士二本甲戌簽西夏

回回軍太廟殿柱朽壞監察御史劾都水劉晟監造
不敬晟以憂卒張易請先期告廟然後完葺從之丙
子敕今歲享太廟毋用犧牛太陰犯畢庚辰右衛親
軍都指揮使忽都等言五河城堡已成唯廬舍未完
凡材甍皆出宋境請率精兵分道抄掠從之壬午山
東路統軍司言宋兵攻膠州千戶蔣德等逆戰敗之
俘統制范廣等五十餘人獲戰船百艘癸未詔忙安
倉失陷米五千餘石特免徵仍禁諸王非理需索詔
以四川民力凋弊免茶鹽等課稅以軍民田租給公
邊軍食仍敕有司自今有言茶鹽之利者以違制論

冬十月癸巳大司農臣言高唐州達魯花赤忽都納
州尹張廷瑞同知陳思濟勸課有效河南府陝縣尹
王仔急於勸課宜加黜陟以示勸懲從之丁酉享于
太廟己未檀順等州風潦害稼賜高麗至元九年曆
十一月辛酉朔敕品官子孫保直勅遣阿魯忒兒等
撫治大理壬戌罷諸路交鈔都提舉司乙亥劉秉忠
及王磐徒單公履等言元正朝會聖節詔赦及百官
宣敕具公服迎拜行禮從之禁行金泰和律建國號
曰大元詔曰誕膺景命奄四海以宅尊必有美名紹
百王而紀統肇從隆古匪獨我家且唐之爲言蕩也

堯以之而著稱虞之爲言樂也舜因之而作號馴至
禹興而湯造互名夏大以殷中世降以還事殊非古
雖乘時而有國不以利而制稱爲秦爲漢者著從初
起之地名曰隋曰唐者因即所封之爵邑是皆徇百
姓見聞之狃習要一時經制之權宜槩以至公不無
少貶我太祖聖武皇帝握乾符而起朔土以神武而
膺帝圖四震天聲大恢土宇輿圖之廣歷古所無頃
者耆宿詣庭奏章申請謂旣成於大業宜早定於鴻
名在古制以當然於朕心乎何有可建國號曰大元
蓋取易經乾元之義茲大治流形于庶品孰名資始

之功予一人底寧千萬邦尤切體仁之要事從因章道協天人於戲稱義而各固匪為之溢美乎休惟永尚不負於投艱嘉與敷天共隆大號丙戌置四川省於成都上都萬安閣成十二月辛卯朔詔天下興起國字學宣徽院請以闌遺漏籍等戶淘金帝曰姑止毋重勞吾民也乙巳減百官俸括西夏田召塔出董文炳赴闕辛亥併太常寺入翰林院宮殿府入少府監甲寅詔尚書省遷入中書省是歲天下戶一百九十四萬六千二百七十賜先朝后妃及諸王金銀幣帛如歲例賜囊家等羊馬價鈔萬一千一百六十七錠

斷死罪一百五人

九年春正月庚申朔高麗國王王植遣其臣禮賓卿宣文烈來賀兼奉歲貢甲子併尚書省入中書省平章尚書省事阿合馬同平章尚書省事張易並中書平章政事參知尚書省事張惠為中書左丞參知尚書省事李堯咨麥朮丁並參知中書政事罷給事中中書舍人檢正等官仍設左右司省六部為四改稱中書丙寅詔遣不花及馬璘諭高麗具舟糧助征耽羅河南省請益兵敕諸路簽軍三萬丁丑敕皇子西平王奧魯赤阿魯帖木兒秃哥及南平王秃魯所部

與四川行省也速帶兒部下并忙古帶等十八族欲
速公弄等土番軍同征建都新安州初隸雄州詔爲
縣入順天庚辰改北京中興四川河南四路行尚書
省爲行中書省京兆復立行省仍命諸王只必帖木
兒設省斷事官給西平王奧魯赤馬價弓矢賜南平
王秃魯銀印及金銀符各五辛巳移鳳州屯田於鹽
白二州敕董文炳時巡掠南境毋令宋人得立城堡
敕軍民訟田者民田有餘則分之軍軍田有餘亦分
之民仍遣能臣聽其直其軍奴入民籍者還正之敕
燕王遣使持香旛祠岳瀆后土五臺興國寺命劉整

總漢軍壬午改山東東路都元帥府統軍司爲行樞
密院以也速帶兒塔出並爲行樞密院副使乙酉定
受宣勅官禮儀詔元帥府統軍司總管萬戶府闕實
軍籍二月庚寅朔奉使日本趙良弼遣書狀官張鐸
同日本二十六人至京師求見辛卯詔札魯忽赤乃
太祖開創之始所置位百司右其賜銀印立左右司
壬辰高麗國王王植遣其臣齊安侯王淑來賀改國
號改中都爲大都甲午命阿木典蒙古軍劉整阿里
海牙典漢軍戊戌以去歲東平及西京等州縣旱蝗
水潦免其租賦庚子復唐州祕陽縣建中書省署於

大都戊申始祭先農如祭社之儀詔諸路開浚水利
車駕幸上都三月乙丑諭旨中書省日本使人速議
遣還安童言良弼請移金州戍兵勿使日本妄生疑
懼臣等以爲金州戍兵彼國所知若復移戍恐非所
宜但開諭來使此戍乃爲耽羅暫設爾等不須疑畏
也帝稱善甲戌括民間四教經焚之蒙古都元帥阿
朮漢軍都元帥劉整阿里海牙督本軍破樊城外郭
斬首二千級生擒將領十六人增築重圍守之賑濟
南路饑詔免醫戶差徭夏四月己丑詔於土蕃西川
界立寧河驛辛卯賜皇子愛牙赤所部馬丙午給西

平王奧魯赤所部米甲寅賑大都路饑五月戊午朔
立和林轉運司以小云失別爲使兼提舉交鈔使已
未給闕闕出海青銀符二辛酉罷簽回回軍癸亥敕
拔都軍於怯鹿難之地開渠耕田丙寅簽徐邳二州
丁壯萬人戍邳州庚午減鐵冶戶罷西蕃充魯干等
處金銀礦戶爲民禁漢人聚衆與蒙古人鬪毆詔議
取耽羅及濟州辛巳敕修築都城凡費悉從官給毋
取諸民并蠲伐木役夫稅賦甲申敕諸路軍戶驅丁
除至元七年前從良人民籍者當差餘雖從良並令
助本戶軍力乙酉太白犯畢距星宮城初建東西華

左右掖門詔安集峇里伯所部流民六月壬辰遣高麗國西京屬城諸達魯花赤及質子金鎰等歸國減乞里吉思屯田所入租仍遣南人百名給牛具以往是夜京師大雨壞墻屋壓死者衆癸巳敕以籍田所儲糧賑民不足又發近地官倉濟之甲午高麗告饑轉東京米二萬石賑之己亥山東路行樞密院塔出於四月十三日遣步騎趨漣州攻破射龍溝五港口鹽場白頭河四處城堡殺宋兵三百餘人虜獲人牛萬計第功賞賚有差辛亥高麗國王王植請討耽羅餘寇秋七月丁巳朔河南省臣言往歲徙民實邊屯

耕以貧苦悉散還家今唐鄧蔡息徐邳之民愛其田廬仍守故屯願以絲銀準折輸糧而內地州縣轉粟餉軍者反厭苦之臣議今歲沿邊州郡宜仍其舊輸糧內地州郡驗其戶數俾折鈔就沿邊和糴庶幾彼此交便利曰可拘括開元東京等路諸漏籍戶禁私鬻田田曆賑水達達部饑戊寅賜諸王八八部銀鈔集都城僧誦大藏經九會壬午和禮霍孫奏蒙古字設國子學而漢官子弟未有學者及官府文移猶有畏吾字詔自今凡詔令並以蒙古字行仍遣百官子弟入學乙酉免徙大羅鎮居民令倍輸租米給鷹坊

詔分閱大都京兆等處探馬赤奴戶名籍八月丙戌朔日有食之戊子立群牧所掌牧馬及尚方鞍勒壬辰敕忙安倉及靖州預儲糧五萬石以備弘吉剌新徙部民及西人內附者廩給調兵增戍全羅州乙未禁諸人以已事輒呼至尊稱號者丁酉立韓脫所己亥諸王闊陶出請以分地寧海登萊三州自爲一路與他王比歲賦惟入寧海無輸益都詔從之癸卯千戶崔松敗宋襄陽援兵斬其將張順賜松等將士有差乙巳車駕至自上都丁未改延州爲延津縣與陽武同隸南京癸丑賑遼東等路饑九月甲子宋襄陽

將張貴以輪船出城順流突入戰阿木阿刺海牙等舉烽燃火燭江如晝率舟師轉戰五十餘里至櫃門關生獲貴及將士二千餘人丙寅敕樞密院諸路正軍貼戶及同籍親戚奴僕丁年既長依諸王權要以避役者並還之軍惟匠藝精巧者以名聞癸酉同簽河南省事崔斌訟右丞阿里妄奏軍數二萬敕杖而罷之甲戌罷水軍總管府東川元帥李吉等略地開州拔石羊寨擒宋將一人統軍使合剌等兵掠合州及渠江口獲戰船五十艘賞銀幣有差丙子發民夫三千人伐巨木遼東免其家徭賦戊寅太陰犯御女賑

益都路饑冬十月丙戌朔封皇子忙哥剌爲安西王
賜京兆爲分地駐兵六盤山遣使持詔諭扮卜忻都
國壬辰享于太廟癸巳趙壁爲平章政事張易爲樞
密副使乙未築渾河堤戊戌熒惑犯填星己亥敕自
七月至十一月終聽捕獵餘月禁之癸卯立文州初
立會同館十一月乙卯朔詔以至元十年曆賜高麗
壬戌發北京民夫六千伐木乾山蠲其家徭賦諸王
只必帖木兒築新城成賜名永昌府丙寅蠲昔剌幹
脫所負官錢丁卯太陰犯畢城光州遣無籍軍掠宋
境己巳敕發屯田軍二千漢軍二千高麗軍六千仍

益武衛軍二千征耽羅辛未召高陸儒者楊恭懿不
至癸酉以前拔樊城外郭功賞千戶劉深等金銀符
已卯併中書省左右司爲一宋荆湖制置李庭芝爲
書遣永寧僧償金印牙符來授劉整廬龍軍節度使封
燕郡王僧至永寧事覺上聞敕張易姚樞雜問適整
至自軍中言宋患臣用兵襄陽欲以是殺臣臣實不
知敕令整爲書復之賞整使還軍中誅永寧僧及其
黨友參知行省政事阿里海牙言襄陽受圍久未下
宜先攻樊城斷其聲援從之回回亦思馬因創作巨
石砲來獻用力省而所擊甚遠命送襄陽軍前用之

十二月乙酉朔詔諸路府州司縣達魯花赤管民長官兼管諸軍奧魯丁亥立肅州等處驛以東平府民五萬餘戶復爲東平路辛丑諸王忽刺出拘括逃民高麗界中高麗達魯花赤上其事詔高麗之民猶未安集禁罷之遣宋議互市使者南歸戊午賜北平王南木合軍馬一萬二千九百九十一羊六萬一千五百三十一及諸王塔察兒軍幣帛辛亥宋將管萬壽來攻成都僉省嚴忠範出戰失利退保子城同知王世英等八人棄城遁詔以邊城失守罪在主將世英雖遁與免其罪惟遣使縛忠範至京師癸丑陞拱衛司爲拱衛直都指揮使司是歲天下戶一百九十五萬五千八百八十賜先朝后妃及諸王金銀幣帛如歲例斷死罪三十九人建大聖壽萬安寺

本紀卷第七

金駝帶帛攻遠
兵一百五十萬

本紀卷第八

元史八

翰林學士中大夫知制誥兼修國史臣宋濂
翰林待制承直郎兼國史院編修官臣王禕等奉
勅修

世祖五

十年春正月乙卯朔高麗國王王禎遣其世子慤來
朝戊午敕自今並以國字書宣命命忻都鄭溫洪茶
丘征耽羅宿州萬戶愛先不花請築堡牛頭山以阨
兩淮糧運不允愛先不花因言前宋人城五河統軍
司臣皆當得罪今不築恐為宋人所先帝曰汝言雖
是若坐視宋人戍之罪亦不免也安南使者還言陳

光晒受詔不拜中書移文責問光晒稱從本俗改回
回愛薛所立京師醫藥院名廣惠司己未禁鷹坊擾
民及陰陽圖讖等書癸亥阿里海牙等大攻樊城拔
之守將呂文煥懼而請降中書省驛聞遣前所俘唐
永堅持詔諭之丁卯立秘書監戊辰給皇子北平王
甲一千置軍器永盈二庫分典弓矢甲冑庚午簽陝
西探馬赤軍己卯川蜀省言宋外曰萬壽攻成都也速
帶兒所部騎兵征建都未還擬於京兆等路簽新軍
六千爲援從之詔遣扎木呵押失寒崔杓持金十萬
兩命諸王阿不合市藥獅子國壬午賞東川統軍合

刺所部有功者合刺請於渠江之北雲門山及嘉陵
西岸虎頭山立二戍以其圖來上仍乞益兵二萬詔
給京兆新簽軍五千益之二月丙戌以皇后皇太子
受冊寶遣太常卿合丹告于太廟丙申雲南羅羽酋
長阿旭叛詔有司安集其民募能捕斬阿旭者賞之
遣斷事官麥肖勾校川陝行省錢穀詔勘馬刺失里
乞帶脫因劉源使緬國諭遣子弟近臣來朝高麗國
王王禎以王師征耽羅乞下令禁俘掠聽自製兵仗
從之丁未宋京西安撫使知襄陽府呂文煥以城降
三月甲寅朔詔申諭大司農司遣使巡行勸課務要

農事有成乙丑敕樞密院以襄陽呂文煥率將吏赴
闕熟券軍并城居之民仍居襄陽給其田牛生券軍
分隸各萬戶翼文煥等發襄陽擇蒙古漢人有才力
者護視以來丙寅帝御廣寒殿遣攝太尉中書右丞
相安童授皇后弘吉刺氏玉冊玉寶遣攝太尉同知
樞密院事伯顏授皇太子真金玉冊金寶辛未以皇
后皇太子受冊寶詔告天下劉整請教練水軍五六
萬及於興元金洋州汴梁等處造船二千艘從之壬
申分金齒國爲兩路癸酉客星青白如粉絮起畢度
五車北復自文昌貫斗杓歷梗河至左攝提凡二十

一日以前中書左丞相耶律鑄平章軍國重事中書
左丞張惠爲中書右丞車駕幸上都西蜀嚴忠範以
罪罷遣察不花等撫治軍民罷中興等處行中書省
夏四月癸未朔阿里海牙以呂文煥入朝授文煥昭
勇大將軍侍衛親軍都指揮使襄漢大都督賜其將
校有差時將相大臣皆以聲罪南伐爲請驛召姚樞
許衡徒單公履等問計公履對曰乘破竹之勢席卷
三吳此其時矣帝然之詔罷河南等路行中書省以
平章軍國重事史天澤平章政事阿木叅知政事阿
里海牙行荆湖等路樞密院事鎮襄陽左丞相合丹

參知行中書省事劉整山東都元帥塔出董文炳行
淮西等路樞密院事守正陽天澤等陞辭詔諭以襄
陽之南多有堡寨可乘機進取仍以鈔五千錠賜將
士及賑新附軍民甲申免隆興路權課三年丁酉敕
南儒爲人掠賣者官贖爲民辛丑罷四川行省以鞏
昌二十四處便宜總帥汪良臣行西川樞密院東川
閬蓬廣安順慶夔府利州等路統軍使合剌行東川
樞密院東川副統軍王仲仁同僉行樞密院事仍命
汪良臣就率所部軍以往五月壬子朔定內外官復
舊制三歲一遷甲寅禁無籍軍從大軍殺掠其願爲

軍者聽戊辰詔天下獄囚除殺人者待報其餘一切
踈放限以八月內自至大都如期而至者皆赦之乙
亥詔免民代輸簽軍戶絲銀及伐木夫戶賦稅負前
朝官錢不能償者毋徵主守失陷官錢者杖而釋之
陣亡軍及營繕工匠無丁產者量加廩給以雄易州
復隸大都庚辰賞襄陽有功萬戶奧魯赤等銀鈔衣
服有差六月乙酉賑諸王塔察兒部民饑丁亥以各
路弓矢甲匠並隸軍器監免大都南京兩路賦役以
紓民力賑甘州等處諸驛辛卯汰陝西貧難軍以劉
整阿里海牙不相能分軍爲二各統之癸巳救襄陽

造戰船千艘甲午改資用庫爲利用監丁酉置光州
等處招討司戊申經畧忻都等兵至耽羅撫定其地
詔以失里伯爲耽羅國招討使尹邦寶副之陞拱衛
直爲都指揮司使日本趙良弼至太宰府而還具以
日本君臣爵號州郡名數風俗土宜來上閏月癸丑
敕諸道造甲一萬弓五千給淮西行樞密院己巳罷
東西兩川統軍司辛未以翰林院纂修國史敕采錄
累朝事實以備編集丙子以平章政事賽典赤行省
雲南統合刺章鴨赤赤科金齒罕章諸蠻賜銀貳
萬五千兩鈔五百錠秋七月辛巳以金州軍八百人

及統軍司還成都忽朗吉軍千人隸東川壬午以修
太廟將遷神主別殿遣兀魯忽奴帶張文謙祭告丙
戌敕樞密院襄陽生券軍無妻子者發至京師仍益
兵衛送其老疾者遣還家庚寅河南水發粟賑民饑
仍免今年田租省西涼府入永昌路戊申高麗國王
王禎遣其順安公王棕同知樞密院事宋宗禮賀皇
后皇太子受冊禮成八月庚戌朔前所釋諸路罪囚
自至大都者凡二十二人並赦之甲寅鳳翔寶鷄縣
劉鐵妻一產三男復其家三年丁丑聖誕節高麗王
王禎遣其上將軍金詵來賀己卯賜襄陽生熟券軍

冬衣有差九月辛巳遼東饑弛獵禁以合伯為平章
政事壬午立河南宣慰司供給荆湖淮西軍需甲申
襄陽生券軍至大都詔伯顏論之釋其械繫免死罪
聽自立部伍俾征日本仍敕樞密院具鎧仗人各賜
鈔娶妻於蒙古漢人內選可為率領者丙戌劉秉忠
姚樞王磐竇默徒單公履等上言許衡疾歸若以太
子贊善王恂主國學庶幾衡之規模不致廢墜又請
增置生員並從之秉忠等又奏置東宮宮師府詹事
以次官屬三十八人戊子遣官詣荆湖行省差次有
功將士禁京畿五百里內射獵己丑敕自今秋獵罷

豕先薦太廟壬辰中書省臣奏高麗王王植屢言小
國地狹比歲荒歉其生券軍乞駐東京詔令營北京
界仍敕東京路運米二萬石以賑高麗丁酉立正陽
諸驛敕河南宣慰司運米三十萬石給淮西合答軍
仍給淮西京湖軍需有差壬寅敕會同館專居降附
之入覲者以翰林學士承旨和禮霍孫兼會同館事
以主朝廷咨訪及降臣奏請征東招討使塔匣刺請
征骨嵬部不允丙午置御藥院車駕至自上都給諸
王塔察兒所部布萬疋冬十月乙卯享于太廟丙辰
以西川編民東川義士軍屯田餉潼川青居戍兵敕

伯顏和禮霍孫以史天澤姚樞所定新格參考行之
庚申御史臺臣言沒入贓罰爲鈔一千三百定詔有
貧乏不能存者以此賑之有司斷死罪五十人詔加
審覆其十三人因鬪毆殺人免死充軍餘令再三審
覆以聞禁牧地縱火以合荅帶爲御史大夫陞襄陽
府爲路罷廣寧府新僉軍初建正殿寢殿香閣周廡
兩翼室西蜀都元帥也速荅兒與皇子奧魯赤合兵
攻建都蠻擒酋長下濟等四人獲其民六百建都乃
降詔賞將士有差十一月癸未命布只兒修起居注
丁未大司農司言中書移文以畿內秋禾始收請禁

農民覆耕恐妨芻牧帝以農事有益詔勿禁十二月
己酉朔安童等言昔博赤伯都謂總管府權太重宜
立運司并諸軍奧魯以分之臣以今之民官循例遷
徙保無邪謀別立官府於民未便帝然之壬子賜襄
樊被傷軍士鈔千錠甲寅宋夏貴攻正陽淮西行院
擊走之壬戌召阿木同呂文煥入覲大司農司請罷
西夏世官括諸色戶從之安南國王陳光昞遣使來
貢方物諸王薛閣禿以罪從軍累戰皆捷召赴闕已
巳省陝州魏畧朱陽二縣入靈寶賜萬戶解汝楫銀
萬五千兩諸王孛兀兒出率所部兵與皇子北平王

元史本紀卷八
合軍討叛臣聶古伯平之賞立功將士有差賜諸王金銀幣帛如歲例是歲諸路蟲蝻災五分霖雨害稼九分賑米凡五十四萬五千五百九十石天下戶一百九十六萬二千七百九十五

十一年春正月己卯朔宮闕告成帝始御正殿受皇太子諸王百官朝賀高麗國王王植遣其少卿李義孫等來賀兼奉歲貢乙酉以金州招討使欽察率襄陽生熟券軍千人戍鴨池庚寅初立軍官以功陞散官格免諸路軍雜賦以忙古帶等新舊軍一萬一千五百人戍建都立建都寧遠都護府兼領互市監

辰置西蜀四川屯田經畧司丁酉長春宮設周天金籙醮七晝夜敕荆湖行院以軍三萬水弩砲手五千隸淮西行院丙午彰德趙當道等以謀逆伏誅餘從者論罪有差立于闐鴉兒看兩城水驛十三沙州北陸驛二免于闐采玉工差役阿里海牙言荆襄自古用武之地漢水上流已為我有順流長驅宋必可平阿朮又言臣畧地江淮備見宋兵弱於往昔今不取之時不能再帝趣召史天澤同議天澤對曰此國大事可命重臣一人如安童伯顏都督諸軍則四海混同可計日而待矣臣老矣如副將者猶足為之帝曰

伯顏可以任吾此事矣阿朮阿里海牙因言我師南
征必分爲三舊軍不足非益兵十萬不可詔中書省
僉軍十萬人二月戊申朔賜阿朮所部將士及茶罕
章阿吉老耆等銀鈔有差甲寅太陰犯井宿庚申新德
副元帥楊堯元戰沒以其子襲職初立儀鸞局掌宮
門管鑰供帳燈燭壬申造戰船八百艘於汴梁以廉
希憲爲中書右丞北京等處行中書省事車駕幸上
都三月己卯詔以勸課農桑諭高麗國王王植仍命
安撫高麗軍民總管洪茶丘提點農事己丑呂文
隨司千戶陳炎謀叛誅首惡二人其隨司軍併其

子皆令內徙庚寅敕鳳州經畧使忻都高麗軍民總
管洪茶丘等將屯田軍及女直軍并水軍合萬五千
人戰船大小合九百艘征日本移碣門兵戍合峇城
辛卯改荆湖淮西二行樞密院爲二行中書省伯顏
史天澤並爲左丞相阿朮爲平章政事阿里海牙爲
右丞呂文煥爲參知政事行中書省於荆湖合峇爲
左丞相劉整爲左丞塔出董文炳爲參知政事行中
書省於淮西遣使代祀嶽瀆后土河南宣慰司言軍
興轉輸煩重宜賦軍匠諸口權助財用從之癸巳獲
嘉縣尹常德課最諸縣詔優賞之亦乞里帶強取民

租產桑園廬舍墳墓分爲探馬赤軍牧地詔還其民
萬戶阿里必嘗發李璫逆謀爲璫所殺以其子刺刺
吉襲職改金州招討司爲萬戶府遣要速木咱興慙
失招諭八魯國帝師八合思八歸土番國以其弟亦
鄰真襲位建大護國仁王寺成夏四月辛亥分陝西
隴右諸州置提刑按察司治鞏昌癸丑初建東宮甲
寅誅西京訛言惑衆者括諸路馬五萬匹辛未詔安
慰幹端鴉兒看合失合兒等城賜襄樊戰死之士二
百四十九人之家每家銀百兩乙亥命也速帶兒將
千人同撒吉思所部五州丁壯戍益都五月丙戌汪

惟正以所部軍逃亡乞於民站戶選補從之敕北京
東京等路新簽軍恐不宜暑權駐上都乙未樞密院
臣言舊制蒙古軍每十人月食糧者惟拔都二人今
遣怯薛丹合丹覈其數多籍二千六百七十人救扶
合丹斥無入宿衛謫往西川效死軍中餘定罪有差
丙申以皇女忽都魯揭里迷失下嫁高麗世子王愷
辛丑敕隨路所僉新軍其戶絲銀均配於民者並除
之六月丙午朔劉整乞益甲仗及水弩手給之庚戌
賜達都合馬里戰士銀鈔有差癸丑敕合答選部下
蒙古軍五千人與漢軍分戍沿江堡隘爲使傳往來

之衛仍以古不來拔都翟文彬率兵萬人掠荆南鴉山以綴宋之西兵丙辰免上都隆興兩路簽軍庚申問罪於宋詔諭行中書省及蒙古漢軍萬戶千戶軍士曰爰自太祖皇帝以來與宋使介交通憲宗之世朕以藩職奉命南伐彼賈似道復遣宋京請我請罷兵息民朕即位之後追憶是言命郝經等奉書往聘蓋爲生靈計也而乃執之以致師出連年死傷相藉係累相屬皆彼宋自禍其民也襄陽既降之後龔宋悔禍或起令圖而乃執迷罔有悛心所以問罪之師有不能已者今遣汝等水陸並進布告遐邇使咸知

之無辜之民初無預焉將士毋得妄加殺掠有去逆效順別立奇功者驗等第遷賞其或固拒不從及逆敵者俘戮何疑甲子分遣忙古帶八都百家奴率武衛軍南征丙寅以合剌合孫爲中書左丞崔斌參知政事仍行河南道宣慰司事敕有司閱覈延安新軍貧無力者免之戊辰監察御史言江淮未附將帥闕人今首用阿里海牙子忽失海牙劉整子垓素不知兵且缺人望宜依弟男例罷去從之秋七月乙亥朔敕山北遼東道提刑按察使元魯失不花同參知政事廉希憲行省北京國王頭輦哥毋署事有大事則

希憲等就議乙酉徙生券軍八十一人屯田和林癸
巳高麗國王王植薨遣使以遺表來上且言世子愷
孝謹可付後事勅同知上都留守司事張煥冊愷爲
高麗國王乙未伯顏等陞辭帝諭之曰古之善取江
南者唯曹彬一人汝能不殺是吾曹彬也興元鳳州
民獻麥一莖四穗至七穗穀一莖三穗八月甲辰朔
頒諸路立社稷壇壝儀式丁未史天澤言今大師方
興荆湖淮西各置行省勢位既不相下號令必不能
一後當敗事帝是其言復改淮西行中書省爲行樞
密院癸丑行中書省言江表未下之州請令呂文煥

率其麾下臨城諭之令彼知我寬仁善遇降將亦策
之善者也從之甲寅弛河南軍器之禁辛未高麗王
愷遣其樞密使朴瑆來賀聖誕節詔太原新僉軍遠
戍兩川誠可憫恤諭樞密院遣使分括廩粟給其家
九月丙戌行中書省以大軍發襄陽檄諭宋州郡官
吏將校士民癸巳師次鹽山距郢州二十里宋兵十
餘萬當郢夾漢水城萬勝堡兩岸戰艦千艘鐵鉅橫
江貫大艦數十逼我舟師不得下惟黃家灣有溪經
鷓子山入唐港可達于江宋又爲埧築堡其處駐兵
守之繫舟數百與埧相依伯顏督諸軍攻拔之鑿埧

元史本紀卷八
挽舟入溪出唐港整列而進車駕至自上都冬十月
己酉享于太廟庚申長河西千戶必剌冲剽掠甲仗
集衆爲亂火你赤移戍未還副元帥覃澄率屬吏赴
之帝曰澄不必獨往趣益兵三千付火你赤合力討
之壬戌歲星犯壘壁陣乙丑伯顏督諸將破沙洋堡
生擒守將串樓王翌日次新城總制黃順縋城降伯
顏遣順招都統邊居義不出總管李庭破其外堡諸
軍蟻附而登接之居義自焚死辛未賜北平王南木
合馬三萬羊十萬十一月庚辰斷死罪三十九人壬
午勅西川行樞密院也速帶兒取嘉定府癸未符寶

郎董文忠言比聞益都彰德妖人繼發其按察司達
魯花赤及社長不能禁止宜令連坐詔行之乙酉軍
次復州宋安撫使翟貴出降丁亥詔宋嘉定安撫督
萬壽及九守城將校納款來降與避罪及背主叛亡
者悉從原免癸巳東川元帥楊文安與青居山蒙古
萬戶怯烈乃也只里等會兵達州直趣雲安軍至馬
湖江與宋兵遇大破之遂拔雲安羅拱高陽城堡賜
文安等金銀有差以香河荒地千頃置中衛屯伯顏
遣萬戶帖木兒譯史阿里奏沙洋新城之捷且以新
城總制黃順來見賜順黃金錦衣及細甲授湖北道

宣慰使佩虎符敕京師盜詐者衆宜峻立治法召征日本忽敦忽察劉復亨三沒合等赴闕壬寅安童以阿合馬擅財賦權蠹國害民凡官屬所用非人請別加選擇其營作官殿資緣爲姦亦宜詰問帝命窮治之起閣南直大殿及東西殿增選樂工八百人隸教坊司十二月丙午伯顏大軍次漢口宋淮西制置使夏貴都統高文明劉儀以戰船萬艘分據諸隘都統王達守陽羅堡荆湖宣撫朱禔孫以游擊軍扼中流師不得進用千戶馬福言自漢口開埧引船會淪河口徑趨沙蕪遂入大江癸丑以諸路逃奴之無主者

二千人隸行工部甲寅賞忻都等征虜羅功銀鈔幣帛有差乙卯阿里海牙督萬戶張弘範等攻武磯堡宋夏貴以兵來援阿朮率萬戶晏徹兒等四翼軍對青山磯泊丙辰萬戶史格以一軍先渡爲宋荆鄂諸軍都統程鵬飛所敗總管史塔刺渾等率衆赴敵鵬飛敗走進軍沙洲抵觀音山夏貴東走遂破武磯堡斬宋都統王達始達南岸追至鄂州南門而還丁巳伯顏登武磯山宋朱禔孫遁歸江陵己未師次鄂州宋直祕閣湖北提舉張晏然權知漢陽軍王儀知德安府來興國並以城降程鵬飛以本軍降伯顏承制

以宋鄂州民兵總制王該知鄂州事王儀來興國仍
舊任撤其戍兵分隸諸軍下令禁侵暴凡逃民悉縱
還之以阿里海牙兵四萬鎮鄂漢伯顏阿朮將大軍
水陸東下以侍衛親軍都指揮使禿滿帶為諸軍殿
以襄陽路總管賈居貞為宣撫使商議行中書省事
庚申淮西正陽火廬舍甲仗焚蕩無餘杖萬戶愛先
不花等有差癸亥賜六一真人李居素第一區仍賜
額曰太乙廣福萬壽宮行中書省以渡江捷聞敕縱
呂文煥隨司軍悉還家割南陽廬氏縣隸嵩州置歸
德永城縣長武縣省入涇川良原縣省入靈臺是歲

天下戶一百九十六萬七千八百九十八諸路好蠲
等蟲災凡九所民饑發米七萬五千四百一十五石
粟四萬五百九十九石以賑之

十二年春正月癸酉朔高麗國王王愷遣其判閣事
李信孫來賀及奉咸幣甲戌大軍次黃州宋泚江制
置副使知黃州陳奕以城降伯顏承制授奕泚江大
都督其子巖知漣州奕遣人以書諭之書至巖即出
降乙亥徙襄陽新民七百戶於河北東川副都元帥
張德潤拔禮義城殺宋安撫使張資招降軍民千五
百餘人繼遣元帥張桂孫畧地俘總管郭武及都轄

唐惠等六人以歸賜德潤金五十兩及西錦金鞍細甲弓矢部下將士鈔三百錠戊寅劉整卒安西王相府乞給鈔萬錠為軍需勅以千錠給之癸未師次蘄州宋安撫使管景模以城降乙酉敕樞密院以納忽帶兒也速帶兒所統戍軍及再簽登萊丁壯八百人付五州經畧司其郟城十字路亦聽經畧司節度丙戌大軍次江州宋江西安撫使知江州錢真孫及淮西路六安軍曹明以城降丁亥樞密院臣言宋邊郡如嘉定重慶江陵郢州漣海等處皆阻兵自守宜降璽書招諭從之宋知南康軍葉閻以城降敕以侍衛

親軍指揮使札的失囊加帶將蒙古軍二千百家奴唐古忙兀兒將漢軍萬人赴蔡州禿滿帶賈忙古帶復將餘兵赴闕己丑遣伯大唐永堅賈詔招諭郢州仍敕襄陽統軍司調兵三千人衛送永堅等選蒙古畏吾漢人十四人赴行中書省為新附州郡民官庚寅遣左衛指揮副使鄭溫唐古帖木兒率衛軍萬人同札的失囊加帶戍黃州詔諭重慶府制置司并所屬州郡城寨官吏軍民舉城歸附壬辰以宣撫使賈居貞簽書行中書省事戍鄂州安南國使者還敕以舊制籍戶設達魯花赤簽軍立站輸租及歲貢等事

諭之乙未遣兵部尚書廉希賢工部侍郎嚴忠範秘書監丞柴紫芝奉國書使于宋丁酉以萬家奴所募願爲軍者萬人南征己亥雲南總管信苴日石買等刺殺合刺章金里威之爲亂者以金賞之命土魯至雲南趣阿魯帖木兒入覲以蠻夷未附者尚多命宣慰司兼行元帥府事並聽行省節度置郡縣尹長選廉能者任之置雲南諸路規措所以贍思丁爲使益衛送唐永堅兵永堅求拜都忙古帶借行許之敕追諸王海都八刺金銀符三十四二月癸卯大軍次安慶府宋殿前都指揮使知安慶府范文肅以城降伯

顏承制授文虎兩浙大都督甲辰以中書右丞博魯歡爲淮南都元帥中書右丞阿里左右副都元帥仍命阿里撒吉思等各部蒙古漢軍會邳州又發蘄宿戍兵將河南戰船千艘赴之遣必闍赤孛羅檢覈西夏權課命開元宣撫司賑吉里迷新附饑民敕畏吾地春夏毋獵孕字野獸立后土祠于平陽之臨汾伏羲女媧舜湯河瀆等廟于河中解州洪洞趙城丙午大軍次池州宋權州事趙卯發自經死都統制張林以城降省西夏中興都轉運司入總管府議以中統鈔易宋交會并發秦州鹽貿易藥材丁未禁無籍自

效軍俘掠新附復業軍民戊申詔諭江黃鄂岳漢陽安慶等處歸附官吏士民軍匠僧道人等令農者就耒商者就塗士庶緇黃各安已業如或鎮守官吏妄有搔擾詣行中書省陳告史天澤卒召游顯揚庭訓赴闕賜陳言人霍昇張和鈔十錠俾從淮東元帥府南征庚戌遣禮部侍郎杜世忠兵部郎中何文著賚書使日本國辛亥遣同知濟南府事張漢英持詔諭淮東制置使李蔚芝壬子洛磁路總管姜毅捕獲農民郝進等四人造祆言惑衆敕誅進餘減死流遠方宋都督賈似道遣計議宋京承宣使阮思聰詣行中

書省請還已降州郡約貢歲幣伯顏使囊加帶同阮思聰還報命留宋京以待使謂似道曰未渡江時入貢議和則可今沿江諸郡皆已內屬欲和則當來面議也囊加帶還乃釋宋京以同簽樞密院事倪德政赴鄂州省治財賦癸丑御史臺臣劾前南京路總管田大成以其弟婦趙氏爲妻廢絕人倫敕杖八十三年不齒時大成已死惟市杖趙氏八十丙辰賞征東元帥府日本戰功錦綃弓矢鞍勒庚申遣塔不帶幹魯召鄂漢降臣張晏然等赴闕仍諭之曰朕省卿所奏云宋之權臣不踐舊約拘留使者實非宋主之罪

儻蒙聖慈止罪擅命之臣不令趙氏之祀者卿言良是卿既不忘舊主必能輔弼我家比卿奏上已遣伯顏按兵不進仍遣兵部尚書廉希賢等持書往使果能悔過來附既往之愆朕復何究至於權臣賈似道尚無罪之之心况肯令趙氏之祀乎若其執迷罔悛未然之事朕將何言天其鑒之辛酉以闊闊出率其部下軍千人及親附軍五百聽阿剌海牙節制允湖南州縣及瀕水之民有來附者俾闊闊出統之拒敵不降者就爲招集詔令大洪山避兵民還歸漢陽復業農畝命阿剌海牙鎮守之又命阿失罕唐永堅慕

公直等與脫烈將甲騎千人持詔招諭鄂州大軍次丁家洲戰船蔽江而下宋賈似道分遣步帥孫虎臣及督府節制軍馬蘇劉義集兵船于江之南北岸似道與淮西制置使夏貴將後軍戰船二千五百餘艘橫亘江中翌日伯顏命左右翼萬戶率騎兵夾岸而進繼命舉巨砲擊之宋兵陣動夏貴先遁似道錯愕失錯鳴鉦斥諸軍散宋兵遂大潰阿朮與鎮撫何瑋李庭等舟師及步騎追殺百五十里得船二千餘艘及軍資器仗督府圖籍符印似道東走揚州阿先不花言夏貴縱北軍岳全還稱欲內附宜降璽書招諭

遂遣其甥胡應雷持詔往諭之甲子大軍次蕪湖縣
宋江東運判知太平州孟之縉以城降都元帥博魯
歡次海州知州丁順以城降乙丑阿里海牙言江陵
宋巨鎮地居大江上流屯精兵不啻數十萬若非乘
此破竹之勢取之江水泛溢鄂漢之城亦恐難守從
其請仍降璽書遣使諭江陵府制置司及高達已下
官吏軍民宋福州團練使知特摩道事農士貴率知
那寡州農天或知阿吉州農昌成知上林州農道賢
州縣三十有七戶十萬詣雲南行中書省請降丙寅
樞密院言渡江初亳州萬戶史格毗陽萬戶石抹紹

祖以輕進致敗乞罪之有旨或決罰降官或以戰功
自贖其從行省裁處禁民間賭博犯者流之北地戊
辰師次采石鎮知和州王善以城降都元帥博魯歡
次漣州宋知州孫嗣武以城降己巳復遣伯木唐永
堅等宣諭鄂州官吏士庶庚午大軍次建康府宋沿
江制置使趙潛南走都統權兵馬司事徐王榮翁福
茅世雄等及鎮軍曹旺以城降宋賈似道至揚州始
遣總管段佑送國信使郝經劉人傑等來歸敕樞密
院迎經等由水路赴闕詔安南國王陳光昞仍以舊
制六事諭之趣其來朝命怯薛丹察罕不花侍儀副

使關思義真人李德和代祀嶽瀆后土車駕幸上都
三月壬申朔宋鎮江府馬軍總管石祖忠以城降行
中書省分遣淮西行樞密院阿塔海駐京口宋誅殿
帥韓震其部將李大明等二百人携震母妻并諸子
文焞文焮自臨安來奔甲戌宋江陰軍僉判李世脩
以城降乙亥諭樞密院比遣達都都元帥火你赤征
長河西以副都元帥覃澄鎮守達都付以璽書安集
其民仍敕安西王忙兀刺諸王只必帖木兒駙馬長
吉分遣所部蒙古軍從西平王奧魯赤征吐蕃命萬
執中唐永堅同前所遣阿失罕等將銳兵千人同往

招諭郢州已降則鎮之不降則從陸路與阿里海牙
忽不來會於荆南丙子國信使廉希賢等至達康傳
旨令諸將各守營壘毋得妄有侵掠宋知滁州王文
虎以城降戊寅賜皇子安西王幣帛八千匹絲萬斤
乙卯改平陰縣新鎮寨爲肥城縣隸濟寧府庚辰宋
知寧國府顏紹卿以城降江東路得府二州五軍二
縣四十三戶八十三萬一千八百五十二口一百九
十一萬九千一百六甲申於中興路置懷遠靈武二
縣分處新民四千八百餘戶丙戌宋常州安撫戴之
泰通判王虎臣以城降國信使廉希賢嚴忠範等至

宋廣德軍獨松關爲宋人所殺丁亥免諸路軍雜賦
辛卯宋將高世傑復據岳州質知州孟之紹妻子又
取復州降將翟貴妻子送之江陵世傑會郢復岳三
州及上流諸軍戰船數千艘兵數萬人扼荆江口壬
辰阿里海牙以軍屯于東岸世傑夜半遁去黎明至
洞庭湖口兵船成列而陣阿里海牙督諸翼萬戶及
水軍張榮實解汝楫等逐世傑于湖口之夾灘遣郎
中張鼎召世傑世傑降阿里海牙以世傑招岳州孟
之紹亦以城降以世傑力屈而降誅之賜北平王南
木合所部馬二千一百八十羊三百癸巳救郟城沂

州十字路戍兵從博魯歡征淮南丙申側布蕃官稅
昔碓州蕃官莊寮男車甲等率四十三族戶五千一
百六十詣四川行樞密院來附戊戌遣山東路經畧
使王儼戍岳州庚子從王磐竇默等請分置翰林院
專掌蒙古文字以翰林學士承旨撒的迷底里主之
其翰林兼國史院仍舊纂修國史典制誥備顧問以
翰林學士承旨兼修起居注和禮霍孫主之辛丑敕
阿朮分兵取揚州夏四月壬寅朔賞討長河西必剌
充有功者及陣亡者金銀鈔幣帛各有差乙巳改西
夏中興道按察司爲隴右河西道丙午立漣州新城



P23

清河三驛阿里海牙駐軍江陵城南沙市攻其柵破
之知荆門軍劉懋降丁未阿里海牙遣郎中張鼎齎
詔入江陵宋荆湖制置朱禕孫湖北制置副使高達
京西湖北提刑青陽夢炎李湜始出降阿里海牙入
江陵分道遣使招諭未下州郡知峽州趙真知歸州
趙仔權澧州安撫毛浚常德府新城總制魯希文舊
城權知府事周公明等悉以城降辛亥遣使招諭宋
五郡鎮撫使呂文福使降甲寅諭中書省議立登聞
鼓如爲人殺其父母兄弟夫婦冤無所訴聽其來擊
其或以細事唐突者論如法辛酉宋郢州安撫趙孟

征伐不息夫爭國家者取其土地人民而已雖得其
地而無民其誰與居今欲保守新附城壁使百姓安
業力農蒙古人未之知也爾熟知其事宜加勉旃湖
南州郡皆汝舊部曲未歸附者何以招懷生民何以
安業聽汝爲之宋嘉定安撫督萬壽遣部將李立奉
書請降言累負罪愆乞加赦免詔遣使招諭之辛巳
宋知辰州呂文興黃仙洞行隋州事傅安國仙人寨
行均州事徐鼎知沅州文用圭知靖州康玉知房州
李鑑等皆以城降荆南湖北路凡得府三州十一軍
四縣五十七戶八十萬三千四百一十五口一百九

十四萬三千八百六十丙戌以三衛新附生券軍赴八達山屯田丁亥召伯顏赴闕以蒙古萬戶阿剌罕權行中書省事遣肅州達魯花赤阿沙簽河西軍萬戶愛先不花達伯顏節制擅撤戍兵詔追奪符印使從軍自效淮東宣撫陳巖乞解官終喪三年不許申嚴層牛馬之禁庚寅宋五郡鎮撫使呂文福來降壬辰宋都統制劉師勇殿帥張彥據常州癸巳諭高麗國王王慤招珍島餘黨之在耽羅者六月庚子朔日有食之宋嘉定安撫使咎萬壽以城降賜名順癸卯遣兩浙大都督范文虎持詔往諭安撫壽州招信五河等處鎮戍官吏軍民遣刑部侍郎伯朮諭朱禩孫以年老多病不任朝謁權留大都無自疑懼諭廉希憲等元沒青陽夢炎李湜家貲如籍還之併徙其家赴都甲辰以萬戶阿剌罕爲行中書省叅知政事獲知開州張章赦其罪章二子柱楫先來降以其子故免死赦失里伯史樞率襄陽熟券軍二千獵戶丁壯二千同范文虎招安豐軍各賜馬十匹其故嘗從丞相史天澤者十九人願宣勞軍中令從樞以行戊申簽平陽西京延安等路達魯花赤弟男爲軍辛亥賞諸王兀魯所部獲功建都者三十五人銀鈔有差定

元魯衛士人各馬二疋從者一匹敕淮東元帥府發
兵及鄂州戍兵與李瓘舊部曲并前河南已簽軍萬
人後免爲民者復籍爲兵並付行中書省戊午詔遣
使招諭宋四川制置趙定應比者畢再興青陽夢炎
赴闕面陳蜀閬事宜奏請緩師令自納款姑從所請
今遣再興宣布大信若能順時達變可保富貴毋爲
塗炭生靈自貽後悔庚申遣重慶府招討使畢再興
持詔招諭宋合州節使張珩江安潼川安撫張朝宗
涪州觀察陽立梁山軍防禦馬壘辛酉宋潼川安撫
使知江安州梅應春以城降乙丑以漣海新附丁順

等括船千艘送淮東都元帥府丙寅宋揚州都統姜
才副將張林步騎二萬人乘夜攻揚子橋木柵守柵
萬戶史弼來告急阿朮自瓜洲以兵赴之詰旦至柵
下才軍夾水爲陣阿朮麾騎兵渡水擊之陣堅不動
阿朮軍引却才軍來逼我軍與力戰才軍遂走阿朮
麾步騎並進大敗之才僅以身免生擒張林斬首萬
八千級戊辰敕塔出率阿塔海也速帶兒兩軍赴漣
水以遜攤爲航羅國達魯花赤罷山東經畧司秋七
月庚午朔阿朮集行省諸翼萬戶兵船于瓜洲阿塔
海董文炳集行院諸翼萬戶兵船于西津渡宋沿江

制置使趙潛樞密都承旨張世傑知泰州孫虎臣等陳舟師于焦山南北阿朮分遣萬戶張弘範等以拔都兵船千艘西掠珠金沙辛未阿朮阿塔海登南岸石公山指授諸軍水軍萬戶劉琛循江南岸東趨夾灘繞出敵後董文炳直抵焦山南麓以擣其右招討使劉國傑趨其左萬戶忽剌出擣其中張弘範自上流繼至趣焦山之北大戰自辰至午呼聲震天地乘風以火箭射其筓蓬宋師大敗世傑虎臣等皆遁走追至圍山獲黃鵠白鷓船數百艘宋人自是不復能軍翌日宋平江都統劉師勇殿帥張彥以兩浙制司

軍至呂城復爲阿塔海行院兵所敗壬申簽雲南落落蒲納烘等處軍萬人隸行中書省癸酉太白犯井詔取茶罕章未附種洛丁丑立衛州至楊村水驛五已卯增置燕南河北道提刑按察司以蔡州驛蒙古軍四百隸阿里海牙漢軍六百從萬戶宋都帶赴江西壬午遣使招宋淮安安撫使朱煥癸未詔遣使江南搜訪儒醫僧道陰陽人等敕左丞相伯顏率諸將直趨臨安右丞阿里海牙取湖南蒙古萬戶宋都帶漢軍萬戶武秀張榮實李恒兵部尚書呂師夔行都元帥府取江西罷淮西行樞密院以右丞阿塔海叅

政董文炳同署行中書省事辛卯太陰犯畢甲午遣使持詔招諭宋李庭芝及夏貴以伯顏為中書右丞相阿木為中書左丞相八月己亥免北京西京陝西等路今歲絲銀癸卯伯顏陛辭南行奉詔諭宋君臣相率來附則趙氏族屬可保無虞宗廟悉許如故授故奉使大理王君候子如珪正八品官己未升任城縣為濟州辛酉車駕至自上都丙寅高麗王王愷遣其樞密副使許珙將軍趙珪來賀聖誕節九月己巳太白犯少民庚午阿合馬等以軍興國用不足請復立都轉運司九量增課程元額鼓鑄鐵器官為局賣禁私造銅器乙亥賞清河新城戰士及死事者銀千兩鈔百錠賜西平王所部鴨城戍兵人馬三匹丁丑以襄陽官牛五千八百賜貧民弛河南鬻馬之禁賜東西川屯戍蒙古軍糧鈔有差戊寅諭太常卿合丹去冬享太宮教牲無用牛今其復之己卯太白犯太微西垣上將壬午阿木築灣頭堡乙酉罷襄陽統軍司甲午宋揚州都統姜才將步騎萬五千人攻灣頭堡阿木阿塔海擊敗之賞淮安招討使乞里迷失及有功將士錦衣銀鈔有差丙申以王昔帖木兒為御史大夫括江南諸郡書版及臨安秘書省乾坤寶典

等書冬十月戊戌朔享于太廟辛丑弛北京義錦等
處獵禁癸丑太陰犯畢十一月丁卯阿里海牙以軍
攻潭州乙亥伯顏分軍為三趨臨安阿剌罕率步騎
自建康四安廣德以出獨松嶺董文炳率舟師循海
趨許浦澈浦以至浙江伯顏阿塔海由中道節度諸
軍期並會于臨安丙子宋權融宜欽三州總管岑從
毅沿邊巡檢使廣西節制軍馬李維屏等詣雲南行
中書省降丁丑阿合馬奏立諸路轉運司凡十一所
已卯宋都帶等軍次隆興府宋江西轉運使知府劉
槃以城降都元帥府檄諭江西諸郡相繼歸附得府
州六軍四縣五十六戶一百五萬一千八百二十九
口二百七萬六千四百壬午伯顏大軍至常州督諸
軍登城四面並進拔其城劉師勇變服單騎南走改
順天府為保定府樞密院言兩都平瀛獵戶新簽軍
二千皆貧無力者宜存恤其家又新附郡縣有既降
復叛及糾眾為盜犯罪至死者既已款伏乞聽權宜
處決皆從之中書省臣議斷死罪詔今後殺人者死
問罪狀已白不必待時宜即行刑其奴婢殺主者具
五刑論乙酉阿剌罕克廣德趨獨松關丙戌太陰犯
軒轅大星已丑遣太常卿合丹以所獲塗金爵三獻

于太廟庚寅伯顏遣降人游介實奉爾璽書副本使于
宋仍以書諭宋大臣甲午以高麗國官制僭濫遣使
諭旨凡省院臺部官名爵號與朝廷相類者改正之
十二月戊戌填星犯亢己亥僉書四川行樞密院事
咎順言紹慶府施州南平及諸蠻呂告馬蒙阿永等
有嚮化之心又播州安撫楊邦憲思州安撫田景賢
未知逆順乞降詔使之自新並許世紹封爵從之辛
丑董文炳軍次許浦宋都統制祁安以本軍降宋主
爲書介國信副使嚴忠範姪煥請和甲辰伯顏次平
江府宋都統王邦傑以城降乙巳免江陵等處今歲

田租丁未改諸站提領司爲通政院戊申中書左丞
相忽都帶兒與内外文武百寮及緇黃者庶請上皇
帝尊號曰憲天述道仁文義武大光孝皇帝皇后曰
貞懿順聖昭天睿文光應皇后不許太陰犯畢庚子
宋主復遣尚書夏士林右史陸秀夫奉書稱姪乞和
西川滄溪知縣趙龍遣間使入宋敕流遠方籍其家
癸亥敕樞密院靖州既降復叛今已平定其遣張通
判李信家屬并同叛者赴都甲子荅宋國主書令其
來降丙寅阿剌罕軍次安吉州宋安撫使趙與可以
城降升高麗東寧府爲路割江東南康路隸江西省

置馬湖路總管府省重慶路隆化縣入南川瀘州海
山縣入昌黎縣復華州鄭縣是歲衛輝太原等路旱
河間霖雨傷稼凡賑米三千七百四十八石粟二萬
四千二百六石天下戶四百七十六萬四千七十七
斷死罪六十八人

本紀卷第八

